

Peqqussutissatut siunnersuummut oqaaseqaatit

Oqaaseqaatit nalinginnaasut

1. Aallaqqaasiut

Siunnersuutip Namminersorerullutik Oqartussat kommunillu inissiaataasa attartortittakkat pigisatut inissianngortissinnaanerit pillugu Inatsisartut peqqussutaat atuuttoq taarsissavaa. Siunnersuut suliaasaqarfimmi suliani misilittagaasut naapertorlugit naleqqussagaavoq, taamatullu aalajangersakkat arlallit peerneqarput, tamatumunnga taarsiullugu inatsisinut allanut ilanngunneqarlutik. Assersuutigalugu piginnittut peqatigiiffiinit maleruagassanut tamanna atuuppoq.

Siunnersuummi Namminersorerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarnermi periusissaq nassuiarneqarpoq, taamatullu Namminersorerullutik Oqartussanit kommuninillu taarsigassarsinissamut periarfissat, taarsigassarsiat inissiap qularnaveeqqusinneratigut qularnaarneqarsinnaanerannut nassuiaatitallit nassuiaatigineqarlutik. Qinnuteqartup tungaaniit isigalugu siunnersuummi maleruagassat qasukkarneqarnerupput, taarsigassarsinissamut atugassarititaasut pitsaanerulersinneqarlutik. Matumani aallarniutigalugu erseqqissaatigineqassaaq, akit nikingassutaannut qularnaveeqqusiissut siornatigumut naleqqiullugu allaanerusunik imaqalermat. Tamanna pillugu siunnersuummi aalajangersakkanut attuumassutilinnut oqaaseqaatit sukumiinerusunik innersuussutigineqarput.

Siunnersuummi siunertarineqarpoq inuit amerlanerusut imminnut inissianik pilersorsinnaalernissaat.

2. Peqqussutissatut siunnersuutip pingaarnersai

Pineqartumut inatsit maanna atuuttusoq inatsisitigut assigiinngitsunik inissisimanernik nassataqartarpoq, tamatumani apeqqutaalluni inissiat attartortittakkat agguataarneqartut tiguneqartullu Namminersorerullutik Oqartussanit imaluunniit kommunimit pineqarnersut. Inatsit maanna atuuttoq malillugu kommunit inissiaataanni attartortittakkani attartortut inissiaruarni inissiat attartukkatik tiguisinnaavaat, inissiaateqarfimmi pineqartumi inissiani attartortittakkani attartortut tigusinissamik kissaateqartut amerlassusaat apeqqutaatinnagit. Namminersorerullutik Oqartussat inissiaataanni attartortittakkani attartortut taamatut periarfissaqanngillat, tassanimi inissiaateqarfimmi inissianik attartortittakkanik attartortut minnerpaamik 75%-iisa isumaqataanissaat piumasarineqarpoq.

Tamatuma saniatigut paasinarsisimavoq inatsimmi aalajangersakkat arlaqartut aaqquissuussinermi siunertaasumut pingaarnermut naleqqiullugu naammassimannigitsut, naleqqussimanatik imaluunniit pisariaqarsimanatik. Taakku siunnersuummi erseqqissaaffigineqarput imaluunniit peerneqarlutik.

Siunnersuummi Namminersornerullutik Oqartussat kommunillu inissiaataannik attartortittakkanik tigusinissamut ataatsimoortunik maleruagassaqaalerpoq. Tamatuma saniatigut arlalitsigut oqaatsitigut allannguisoqarpoq erseqqissaasoqarlunilu.

Inissianik piginnittunut nutaanut atugassarititaasut pitsaanerulersinneqarnissaannik kissaateqarnerup ilaatut taarsigassarsinissamut atugassarititaasut pisortanit taarsigassarsiarititanut attuumassuteqartut pitsannguuteqartinneqangaatsiarput. Namminersornerullutik Oqartussat kommunillu taarsigassarsiarititaat erniaqartitaannginnissaannut akilersugassaannginnissaannullu piffissaliusseq ukiunik 15-iniit 20-inut sivitsorneqarpoq, taamatullu taarsigassarsiat taakku piffissaq akilersorneqarfissaat ukiunik 10-iniit 15-inut allanngortinneqarluni.

Tunisinermut akiusup aalajangersarneqartarneranut atatillugu teknikkikkut aningaasaqarnikkullu naliliisarnerup atorineqartarnera atorunnaarsinneqarpoq. Siunnersuummi niuernerme naligititaasooq malillugu tunisinermut akiusooq tamatigut aalajangersarneqartalissaaq. Tassunga ilanngullugu inissiaateqarfinni pingasunik amerlanerusunilluunniit attartortittakkanik inissiaartaqartuni attartortut tunisinermi akiusumut akikillisaavigineqartalernissaat periarfissinneqarpoq. Akikillisaanermi attartortup piffissami qanoq sivisitigisumi attartortuusimanera apeqqutaatinneqarpoq. Attartortunut illuni ilaqutariinnut ataatsinut inissiani aamma illuni affarleriinni najugaqartunut tunisinermi akiusumut akikillisaasoqartassanngilaq, illut taakkua tamatigut niuernerme naligititaasooq malillugu tunineqartartussaammata.

Siunnersuummi akit nikingassutaannut qularnaveeqqusiissut suli iluanaarniapilunnissamut illersuutitut atorineqarpoq. Kisiannili akit nikingassutaannut qularnaveeqqusiissut siornatigumut naleqqiullugu allaanerusumik imaqaalerpoq. Taamaalilluni akit nikingassutaannut qularnaveeqqusiissut teknikkikkut aningaasaqarnikkullu naliliinerup aamma niuernerme naliliinerup assigiinngissutaata annertoqqataanik qularnaveeqqusiissutaasarunnaarpoq. Tamannattaq teknikkikkut aningaasaqarnikkullu naliliisarnerup siunnersuummit peerneqarnerata kinguneraa. Kisiannili akit nikingassutaannut qularnaveeqqusiissut tunisinermi akiusup niuernermilu naligititaasup assigiinngissutaat tunngavigalugu aalajangerneqartalissaaq. Assigiinngissut taanna taamaallat attartortup qanoq sivisitigisumik attartortuusimanera apeqqutaalluni tunisinermut akigititaasumut akikillisaavigineqarpat pilersinnaavoq.

3. Pisortanut aningaasaqarnikkut allaffissornikkullu sunniutissat

Nunap karsiata kommunillu aningaasanik, inissianik piginnittunngortussanut taarsigassarsiarititassanik amerlanerusunik atugassiisalernissaat naatsorsuutigineqarpoq, tamannalu ilaatigut inissiani attartortittakkani tunineqartuni aserfallatsaaliuisussaataitanerup peerneqarneratigut, ilaatigullu tunisinermi akiusut

60%-iinik, tigusinermut atatillugu pisisumit akilernerqartussanik iluanaaruteqarnikkut illuatungilerneqartussaavoq. Taamaattumik ilanngaatisat ilanngaatigereerlugit siunnersuutip Nunap Karsianut kommuninulluunniit artukkiinissaa naatsorsuutigineqanngilaq.

Allaffissornerup annertunerulernissaa naatsorsuutigineqarpoq, tassami siunnersuummi tigusinermut atatillugu periaasissatut nassuiaatigineqartumi Naalackersuisut kommunalbestyrelsilu tigusinermut atatillugu suliassanik pisussaaffinnillu arlalinnik suliakkerneqartartussanngorput. Taamaattorli suliassat pisussaaffiillu arlallit pineqarput qinnuteqaatip siulliup tiguனர்anur atattillugu ataasiaannarluni sularineqartussat. Tassani ilaatigut inissianur nammineq pigisanur immikkoortunur agguataarinissaq, piginnittut peqatigiiffianik pilersitsinissaq, kiisalu piginnittut peqatigiiffiata malittarisassaanik suliqaarnissaq eqqarsaatigineqarpoq.

2002-miit 1. marts 2007 tungaanur Namminersornerullutik Oqartussat inissiaataannik attartortumiit piginnittumut periaaseq malillugu tigusinerit katillugit 80-it naammassineqarsimapput. Tigusinerit taakku 80-iusut kommuninur 10-nur agguagaapput. Sulili Namminersornerullutik Oqartussat inissiarsuaataannik tigusinernik naammassinnittoqarsimanngilaq, taamaallaat ilaqutariinnur ataatsinur illunur illunillu affarleriinnik tigusisoqartarsimalluni.

- Tigusinernit taakkunannga 25-inur akit nikingassutaannur qularnaveeqqusiortoqanngilaq, tunisinermut akiusur niuernermit naligitaasumit 5%-it sinnerlugit appasinnerunngimmat.
- Inissiat 80-iusur niuernermit nalingat tamakkiisur 69,9 millioner koruuninur naatsorsorneqarpoq, tassalu agguaqatigiissitsinermi akiusur 874.000 koruuningajannik annertussuseqarluni.
- Inissiat 80-iusur tunineqarnerannur aki tamakkiisur 46,2 millioner koruuninur naatsorsorneqarpoq, tassalu agguaqatigiissitsinermi akiusur 577.500 koruuniulluni.
- Akit nikingassutaannur qularnaveeqqusiissutitut nalunaarsukkat 23,7 millioner koruuninur naatsorsorneqarsimapput. Tunisinernur tamaginnur akit nikingassutaannur qularnaveeqqusiissut agguaqatigiissillugu 295.101 koruuninur naleqarsimavur.

Takussutissiaq 1: Akit nikingassutaannut qularnaveeqqusiissut			
Akit nikingas. qularn.1000 koruuninngorlugu	Illuutit amerlassusai	Qularn. aning.katillugit	Qularn. aning. agguaqatigiis.
0	25	0	0
1-100	12	712.537	59.378
101-200	8	986.883	123.360
201-300	7	1.662.248	237.464
301-400	3	1.074.289	358.096
401-500	1	478.944	478.944
501-600	7	4.010.559	572.937
601-700	4	2.533.527	633.382
701-800	6	4.464.026	744.004
801-900	2	1.786.469	893.235
901-1000	0	-	-
1001-1100	0	-	-
1101-1200	2	2.226.055	1.113.028
1201-1300	2	2.444.207	1.222.104
1301-1400	1	1.318.337	1.318.337
	80	23.698.081	295.101

Najoqqutarisaaq: 2002-miit 1.3.2007-imut allannguinerit.

Inissiat nammineq pigisat 80-it niuernermi nalingannit tamakkiisunit 69,9 millioner koruuniusunit 23,7 millioner koruunit akit nikingassutaannut qularnaveeqqusiissutitut uninngatinneqarput, tassalu 34%-erpianik annertussuseqarlutik. Akit nikingassutaannut qularnaveeqqusiissutit maannakkutut ukiumut 1/10-inik nalikillineqartassapput.

Akit nikingassutaannut qularnaveeqqusiissut iluanaarniapilunnissamut illersuutitut atuutsinneqalersimavoq. Ukiuni tallimani aaqqissuussinerup atuuffigisaani akit nikingassutaannut qularnaveeqqusiissutit akilerneqarneranik kinguneqartumik ataasiinnarmik niueruteqartoqarsimavoq.

Siunnersuutit atuutilerneratigit Namminersornerullutik Oqartussat kommunillu inissiaataasa attartortittakkat ataasiakkaarlugit tiguneqarsinnaalernerannut periarfissamik ammaassisoqassaaq, taannalu ataasiakkaarlugit tulleriaraluni tigooqqaanermik taagorneqarpoq. Inissiateqarfimmi pingasunik amerlanerusunilluunniit attartortittakkanik inissiartaqartuni inissianik attartortut nammineq pigisanik pisinermi qanoq annertutigisumik akit nikingassutaannut qularnaveeqqusiisoqartassanersoq siumoortumik nalileruminaappoq. Siunnersuummi niuernermi naligititaasoq tunisinermi akitut atorneqarnissaa toqqarneqarpoq, taamaalillunilu siunissami akit nikingassutaannut qularnaveeqqusiissut taamaallaat pisisup ukiut qassit attartortuusimanera malillugu tunisinermit akimut appaaffigineqarnerani nalunaarsorneqartalissaaq. Akit nikingassutaannut

qularnaveeqqusiissummik naatsorsueriaatsip nutaap pisortat allaffissornerulernerannik kinguneqarnissaa naatsorsuutigineqanngilaq.

4. Inuussutissarsiornermi aningaasaqarnikkut allaffissornikkullu sunniutissat

Siunnersuutip inuussutissarsiornermut sunniuteqarnissaa naatsorsuutigineqanngilaq.

5. Avatangiisinut pinngortitamullu sunniutissat

Siunnersuutip avatangiisinut pinngortitamullu sunniuteqarnissaa naatsorsuutigineqanngilaq.

6. Innuttaasunut allaffissornikkut sunniutissat

Siunnersuutip innuttaasunut allaffissornikkut nammagassanik nassataqarnissaa naatsorsuutigineqanngilaq.

7. Sunniutaasinnaasut annertuut allat

Siunnersuutip allanik sunniuteqarnissaa naatsorsuutigineqanngilaq.

8. Pissutsit naalagaaffeqatigiinnermut namminersulernissamullu tunngasut

Siunnersuutip naalagaaffeqatigiinnermut namminersulernissamullu sunniuteqarnissaa naatsorsuutigineqanngilaq.

9. Oqartussaasunut kattuffinnullu tusarniaaneq il.il.

Peqqussutissatut siunnersuummut missiliuut 7. juni 2006-imiit 7. juli 2006-imut tusarniaassutigineqarpoq. Tamatuma kingorna tunisinermi akiusup aalajangersarneqartarneranut tunngatillugu annertuumik siunnersuut allangortinneqarpoq, taamaattumik siunnersuut 29. september 2006-imiit 10. oktober 2006-imut tusarniaassutigeqqinneqarluni. Siunnersuut Aningaasaqarnermut Pisorta qarfirmut, Sulisoqarnermut Pisorta qarfirmut, Inuussutissarsiornermut Pisorta qarfirmut, KANUKOKA-mut, Kalaallit Nunaanni Sulisitsisut Peqatigiiffiannut, Grønlandsbanken-imut, Sparbank Vest Grønland-imut, SIK-mut aamma A/S Inissiatileqatigiiffik INI-mut tusarniaassutigineqarluni nassiunneqarpoq. Tusarniaanerit marluusut taakku makkuninnga pissutissaqalersitsippat:

Sparbank Vest tusarniaanermi akissuteqanngilaq.

Inuussutissarsiornermut Pisorta qarfik, Sulisoqarnermut Pisorta qarfik aamma GrønlandsBanken siunnersuummut oqaaseqaatissaqarsimangillat, taamaallaalli suliniutit namminersorluni inissianik niuruteqarnermut iluaqutaasussatut isigineqarsinnaasutut nersualaarlugit.

Ataatsimut isigalugu taaneqassaaq, tusarniaaffigineqartut arlallit siunnersuummi aalajangersakkat marlussuit tusarniaanermi akissuteqarnissamut piffissarititaasup nallernerani inissianik attartortitsisarneq pillugu inatsimmut naapertuutinninnerat erseqqissaatigimmassuk. Tamatumunnga tunngatillugu oqaatigineqassaaq, siunnersuutip taassuma akuersissutigineqarnerani attartortitsisarneq pillugu inatsit allannguuteqareersimammat, taamaalillunilu maleruagassat marluusut taakku akunnerminni naapertuutilersimallutik.

Aningaasaqarnermut Pisorta qarfik tusarniaassummut akissuteqaammini akit nikingassutaannut qularnaveeqqusiisarnermi piffissap atuuffissaasup allannguuteqarnerata, kiisalu pisortanit taarsigassarsiat akilersorneqannginnissaannut piffissarititaasup allannguuteqarnerata sunniutissaanik naatsorsuisarnermut assersuusiortoqarnissaanik ujartuivoq. Tamanna tunngavigalugu siunnersuummi aalajangersakkanut attuumassutilinnut oqaaseqaatinik ilanngussisoqarpoq.

Aammattaaq Aningaasaqarnermut Pisorta qarfimmit pisinermit akiusup niuernermit akiusumit aalajangerneqartarnissaa, kisiannili aamma attartortup ukiut attartorfigisai tunngavigalugit akiusumut procentinngorlugit akikillisaasiisoqartarnissaa oqaaseqarfigineqarpoq. Piffissaq attartorfiusoq sivitsoriartortillugu pisinermit akiusumut akikillisaatissaq annertusiartortussaavoq. Aningaasaqarnermut Pisorta qarfimmiit uparuarneqarpoq inatsit niuernermit akiusunut naatsorsuutigineqartunut sunniutissanik pitsaanngitsunik imaqarmat, tamatumalu kingunerisinnaasaatut attartortut inissiamik attartuinnarnissamut kaammattorneqartussaapput, sapinngisamik akiusumut annertunerpaamik akikillisaasiiffigineqarnissaaq iluaqutissatut isumaqarfigissagamikku, tassalu ukiut 21-it tikillugit inissiamik attartuinnarsinnaassallutik.

Oqaaseqaatigineqartut allannguinnissamut tunngaviliinngillat, sunniutissaq eqqortumik nassuiarneqartoq naalakkersuisuni suleqatigiinnissamik isumaqatigiissutaasoq eqqarsaatigalugu ilanngunneqarsimammat, tassanilu allassimavoq attartortut, ukiorpasuarini Namminersornerullutik Oqartussat kommunilluunniit inissiaataanni attartortittakkani attartortuusimasut eqqarsaatigineqassasut. Siunnersuummi § 11, imm. 2-mut oqaaseqaatini assersuusiarineqartut malillugit innuttaasunit amerlasuut annertuunik iluaqutissarsitinneqarnissaaq pineqarpoq. Aningaasaqarnermut Pisorta qarfiup tusarniaanermut akissuteqaammini oqaatigisaatut sunniutissanut niuernermit akiusunut naatsorsuutigisat apeqqutaasussaapput. Tamatuma ineriartornissaa siunissami ungasinnerusumiippoq, taamaattumillu attartortut aalajangersimasut salliutinneqarnissaaq eqqarsaatigalugu sunniutissap pitsaanngitsumik isumaqarnissaa naatsorsuutigineqartariaqarani.

Aningaasaqarnermut Pisorta qarfik tusarniaanermi akissuteqaammini inissianik attartortittakkanik tunisinermit akigititassatut siunnersuutigineqartut inissianik niueruteqarnermut qanoq sunniuteqartussatut naatsorsuutigineqarsinnaanersut pillugit naliliinissamik ujartuivoq, tassunga ilaallutik attartortut piginneqatigiilluni inissianut, inissianut nammineq pigisanut aamma illunut nammineq pigisanut aningaasalersueqataanissaannut naatsorsuutigisat.

Tamatumunnga tunngatillugu oqaatigineqassaaq, tunisinermut akiusumik aalajangersaasarnermi periaatsip inissianik niuruteqarnermi akinut aalajangersaasarnernut allanut sunniuteqarnissaa naatsorsuutigineqanngimmat, tunisinermi akiusoq niuernermi akiusunik naliliisarneq naapertorlugu aalajangersarneqartartussaammat.

Pigineqatigiilluni inissianut, siunnersuutip matuma avataaniittunut tunngatillugu, pigineqatigiilluni inissiaateqariaatsip inissianik nammineq pigisanik pissarsisarnermi tapertatut qinigassatulluunniit allatut atorneqaannarnissaa naatsorsuutigineqarpoq. Ineqariaatsit aningaasalersuerialu assigiinngitsut marluk matumani pineqarput, taamaattumillu siunnersuutip pigineqatigiilluni inissianik niuruteqarnerup ineriartorneranut sunniuteqarnissaa naatsorsuutigineqanngilaq.

Akit nikingassutaannut qularnaveeqqusiisarnermut tunngatillugu Aningaasaqarnermut Pisortaqarfiup qupp. 2-mi oqaaseqaatit tamakkiisut uparuarpai, tassanilu allassimavoq piffissaq qilersorsimaffiusoq siviluallaarpat, tamanna suliffeqarnerup assigisaasalu piareersarneqartarnerannut sunniuteqarnerlussinnaasoq.

Siunnersuutip oqaasertaliorneqarnera allanngortinneqanngilaq, Naalackersuisut misilittagaat malillugit piffissap qilersorsimaffiusup sivilunera suliffeqarnerup piareersarneqartarneranut sunniuteqarluarsinnaammat.

Aningaasaqarnermut Pisortaqarfik tusarniaanermi akissuteqaammini inissianik illunilluunniit tigusermi ilaqutariit qaammammut ineqarnermut aningaasartuutissaannut sunniutissat naatsorsorneqartarnerannut assersuutitik ujartuivoq.

Naalackersuisut isumaat malillugu tamatumunnga assersuutissanik aalajangersimasunik takussutissiortoqassappat tamanna paatsiveerutsitsinermik eqqunngitsumillu paasissutissiinermik pilersitsiinnassaaq, tunisinermut akiusumut, taamaalillunilu taarsigassarsianut akilersuutissanut pissutsit nalorninartut arlaliusussaammata, taakkunangalu nunami sumiiffinni assigiinngitsuni niuernermit naliliinerit assigiinngitsut kiisalu erniat ineriartornerat tamakkiisooq oqaatigineqarsinnaapput.

KANUKOKA-p tusarniaanermut akissuteqaammini oqaatigaa siunnersuut tunngaviusumik inatsimmi § 82-imut akerliusoq, siunnersuut aalajangersakkanik kommunit namminneerlutik aqutsinerannut unioqqutitsisunik imaqarmat. Tusarniaanermut akissuteqaammi siunnersuummi § 5 innersuunneqarpoq, taannalu malillugu kommunalbestyrelsi pisussaavoq qinnuteqaammik tiguseritillutik inissiaatiminnik tunisinissamut suliniutissanik aallartitsissallutik. KANUKOKA-miit oqaatigineqarpoq kommunit namminneerlutik aqutsinerat taamaallaat Inatsisartut inatsisaat aqutugalugu kalluarneqarsinnaasoq, tassanilu Inatsisartut peqqussutaat atorneqarsinnaanngitsoq.

Tamatumunnga tunngatillugu oqaatigineqassaaq, Inatsisartut inatsisaasa aamma Inatsisartut peqqussutaasa akornanni assigiinngisitsisoqanngimmat. Taaguutit taakku immikkoortinneqartarnerannut suliassaqarfiup naalagaaffimmit tapiiffigineqarluni

imaluunniit tapiiffigineqarani Kalaallit Nunaannut nuunneqarsimanera tunngavigineqartarpoq. Tamanna Namminersornerullutik Oqartussat pillugit inatsimmut nr. 577-imut, 29. novembari 1978-imeersumut oqaaseqaatini aamma allassimavoq. Kiisalu oqaaseqaatini allassimasut malillugit inissianik pilersuineq, inissialiortiternermut tapersiissuteqartarpoq, inissianik attartortitsisarneq il.il. pillugit inatsit nr. 944, 23. december 1986-imeersoq naapertorlugu Namminersornerullutik Oqartussat ineqarpoq naalagaaffimmit tapiiffigineqarluni tigusimagaa. Tamatuma kingorna maleruagassiarineqartut Inatsisartut peqqussutaattut taaguuserneqarput, taakkulu tunngaviusumik inatsimmi § 82 naapertorlugu "inatsisip" nalingai.

Siuliani ataqtigiisitsinerit nassatarisaannik siunnersuummi oqaasertaliunneqartut allanngortinneqanngillat.

SIK-miit oqaatigineqarpoq, inissianik attartukkanik inissiatut illutulluunniit nammineq pigisatut tigusinissamik qinnuteqaatit suliarineqartarneri sivisunerpaaffilerlugit aalajangersakkamik ilanngussisoqartariaqaraluartoq. SIK-miit qaammatit pingasut siunnersuutigineqarput.

SIK-p siunnersuutaa tunngavilersorluagaavoq, siunnersuutillu suliarineqarneranut atatillugu aammattaaq taamatut piffissamik aalajangersaasoqassanersoq sukumiisumik isumaliutigineqarsimalluni. Kisiannili taamatut piffissaliinissaq allaffissornikkut ajornartorsiortitsilersinnaasutut naliliiffigineqarpoq, sullissinermi ilaatigut pissutsit avataaneersut apeqqutaasartussaammata. Assersuutigalugu piginnittut peqatigiiffianni malittarisassiornermut atatillugu eqqartuussissuserisumik suleqataasoqartillugu. Pissutsit taamaattut peqqutaallutik allaffissornermi piffissap sullissiviusup sivisunerpaaffissaa malinneqarsinnaassanngilaq.

SIK-miit aamma oqaatigineqarpoq, siunnersuummi namminerisamik piginnittut peqatigiiffii ineqarnikkut nammaqatigiinnissamut akisussaaffeqartitaanngitsut, inissiaateqarfimmi inissiat Namminersornerullutik Oqartussat kommunalbestyrelsilluunniit pigisaat attartorneqanngitsut annerpaamik neqerooruteqartumut tunineqartussaammata. Tamatumunnga tunngatillugu oqaatigineqassaaq, siunnersuummi inuit amerlanerusut inissianik nammineq pigisassaminnik imminnut pilersorsinnaanissaat aammalu inissiani namminneq pigisaminni ileqqaagaqarsinnaanissaat eqqarsaatigineqartuni pingaarnerpaammat. Taamaattumik ineqarnikkut nammaqatigiinnissaq tamatumunnga naleqqiullugu tunulliunneqarpoq, tassungalugu tunngatillugu aamma oqaatigineqassaaq, maanna attartortuusut inissiaateqarfimmi attartortuinnarnissartik kissaatigigunikku attartuinnarsinnaammata.

Tamatuma saniatigut SIK-miit siunnersuummi § 4, imm. 2 naapertorlugu aningaaseriviup qularnaveeqqusiissutaata akilernerqartarnissaanut assersuutissanik aalajangersimasunik kissaateqartoqarpoq. Oqaaseqaatini oqaatigineqartutut tamatumani pisut ataasiakkaat naliliiffigineqartarnissaat pineqarpoq. Aalajangersakkami siunertaasoq pingarneq tassaammat saaffiginnissutit pimoorusaanngitsut immikkoortinneqartarnissaat, tassanissaaq aalajangersakkamut oqaaseqaatit takukkit, pissutsit qanoq ittut ilanngunneqartussatut pineqarnersut

tamakkiisumik taakkartorneqarsinnaanngillat. Taamaattumik siunnersuutip oqaasertaliornera allanngortinneqanngilaq.

Kiisalu aamma SIK-miit oqaatigineqarpoq, qinnuteqartoq pisuni tamaginni aningaasartuutissanut, Naalakkersuisunit imaluunniit kommunalbestyrelsimit aningaaserivimmik qularnaveeqqusiititsinikkut matussuserneqartussanut uppersartaatinik piumasaqarsinnaasariaqartut. Siunnersuummi § 4, imm. 2-mut oqaaseqaatini allassimavoq, pisut ilaanni akit, avataaniit siunnersortit sullissinernut assingusunut akigitissinnaasaat tapertarissallugit pisariaqarsinnaasoq. Tamatumunnga tunngatillugu oqaatigineqassaaq, Naalakkersuisut imaluunniit kommunalbestyrelsi pisut amerlanersaanni isumalluutissat killeqarnerat peqquutigalugu tamatigit soorlu malittarisassiornerit avataaniit siunnersortinut isumagitittariaqartassagaat.

SIK-miit oqaatigineqarpoq akit nikingassutaannut qularnaveeqqusiissutip nalikillisikkiartuaartinneqarneranut siunnersuummi § 13, imm. 3 naapertorlugu piffissaliussaq siunnersuummi taaneqartutut ukiunut tallimanut aalajangernagu ukiunut pingasunut apparteqqinneqartariaqartoq. Tamatumunnga tunngatillugu oqaatigineqassaaq peqqussummi pineqartumi ukiuni qulini nalikillisitsiartuaarnissamut piffissaliussaq siunnersuummi matumani ukiunut tallimanut appartinneqarmat. Tamatumunnga suliffeqarnermi nuttarnepup annertusitinniarneqarnera peqquataavoq, taamaalilluni suliffiit inissiallu maannakkutut annertutigisumik imminnut attuumatinneqarunnaassallutik.

Kisiannili piffissaq nalikillisitsiartuaarfiusoq ukiunut pingasunut appartinneqassappat, aamma iluanaarniapilunnissaq atuutilersussat naliliiffigineqartoq eqqarsaatigineqarpoq. Taamaattumik siunnersuutip oqaasertaliornera allanngortinneqanngilaq.

A/S Inissiaatileqatigiiffik INI-mit oqaatigineqarpoq, siunnersuut tigusinermut atatillugu suliatigit kingunerisassat iliuusissallu pillugit aalajangersakkanik imaqartariaqartoq. Taanna tunngavilersugaalluortoq malunnarpoq, tamannalu tunngavigalugu siunnersuummut § 5, imm. 2 ilanngunneqarpoq, taannalu malillugu Naalakkersuisut inissianik attartortittakkanik agguataarisarnermut sukumiinerusunik maleruagassiorsinnaapput, tassunga ilaatigit nalunaarsuinissamut tunngassuteqartut ilaatinneqarlutik.

Kalaallit Nunaanni Sulisitsisut Peqatigiiffiannit oqaatigineqarpoq, siunnersuummi § 9, nr. 2 assigiisitsinissaq eqqarsaatigalugu eqqarsarnartoqartoq. Oqaaseqaateqarneq tunngavigalugu aalajangersagaq siunnersuummit peerneqarpoq, taamaalillunilu inissiaateqarfimmi inissianit attartortittakkanit Namminersornerullutik Oqartussanit imaluunniit kommunimit pigineqartunit nuuttoqarnera peqquutigalugu attartukkat inueruttut niuernerme piumasqaatit tunngavigalugit annerusunik akiliiniarlutik neqerooruteqartunut tunineqarsinnaasassapput, attartortunut inissiamik attartortittakkamik inissiatut nammeneq pigisatut tigusinissamik kissaateqarnerminnik nalunaaruteqartunut tunineqaratik. Aaqqiissutissaq taanna aamma aaqqiissuuserup aqunneqarneranut oqilisaataassaaq.

Kalaallit Nunaanni Sulisitsisut Peqatigiiffiannit siunnersuummi § 11, imm. 2-p oqaasertaliorneira isornartorsiorneqarpoq, taassumami atuutilerneratigut innuttaasut ataasiakkaat inissianik najukkaminnik inissiatut imaluunniit illutut nammineq pigisatut tigusinerminni aningaasaqarnikkut iluanaaruteqangaatsiarsinnaalissapput. Kalaallit Nunaanni Sulisitsisut Peqatigiiffiannit oqaatigineqartut malillugit aalajangersagaq assigiisitsinissamut tunngavissanut nalinginnaasunut, kiisalu Naalakkersuisut innuttaasut annertunerusumik ileqqaagaqartinneqartarnissaannik politikikkut anguniagaattut nalunaarutigineqartunut akerliuvoq.

Siunnersuummi § 11, imm. 2-mi aalajangersakkap oqaasertaliorneqarnera allangortinneqanngilaq, siunertarineqartut ilaannik, aammattaaq naalakkersuinikkut suleqatigiinnissamut isumaqatigiisummi allassimasunik ersersitsimmat. Naalakkersuisuniit Kalaallit Nunaanni Sulisitsisut Peqatigiiffiannit isummersuutit isumaqatigineqanngillat, siunnersuummi § 11, imm. 2-mut oqaaseqaatigisaminni assersuutigisaat aaqqissuussinerup innuttaasut ilarpassinut iluaqutissartaqarnissaanik takutitsimmata.

Peqqussutissatut siunnersuut tusarniaanermi akissuteqaatit qulaani taaneqartut ilanngullugit Inatsisartut 2007-imi upernaakkut ataatsimiinneranni immikkoortoq 23-itut saqqummiunneqarpoq.

Inatsisartut 2007-mi upernaakkut ataatsimiinneranni tusagassiuutitigut aammalu politikikkut attartortumiit piginnittumut aaqqissuussineq atuuttoq kiisalu peqqussutissatut siunnersuut saqqummiunneqartoq pillugit oqallittoqarpoq.

Oqallinnerup kingunerisaanik Naalakkersuisut 24. april 2007 ataatsimiinnerminni aalajangerput peqqussutissatut siunnersuut saqqummiunneqartoq tunuartinniarlugu tassungalu taarsiullugu nutaamik peqqussutissatut siunnersuusiorniarlutik.

Peqqussutissatut siunnersuut nutaaq 9. maj 2007-imiit 20. juni 2007-imut Aningaasaqarnermut Pisorta qarfirmut, Sulisoqarnermut Pisorta qarfirmut, Inuussutissarsiornermut Pisorta qarfirmut, KANUKOKA-mut, Kalaallit Nunaanni Sulisitsisut Peqatigiiffiannut, Ilik-mut, Nusuka-mut, Grønlandsbanken-imut, Sparbank-imut, SIK-mut aamma A/S Inissiatileqatigiiffik INI-mut tusarniaassutigineqarpoq. Tusarniaanermi akissuteqaatit makkuninnga pissutissaqalersitsipput:

Aningaasaqarnermut Pisorta qarfik, Inuussutissarsiornermut Pisorta qarfik, Kalaallit Nunaanni Sulisitsisut peqatigiiffiat, Grønlandsbanken, Iserit A/S aamma SIK tusarniaanermut akissuteqarput.

Kalaallit Nunaanni Sulisitsisut Peqatigiiffiat aamma Grønlandsbanken siunnersuutitip najoqqutassatigut imarisaanut oqaaseqaatissaqarsimanngillat.

Inuussutissarsiornermut Pisorta qarfirmut inissiat nammineq pigisat amerlinissaannik suliniuteqartoqarnera, kiisalu teknikkikkut aningaasaqarnikkullu naliliisarnerup peerneqarnera iluarisimaarneqarpoq.

Siunnersuutip najoqqutassatigut imarisaanut tunngatillugu tusarniaanermi akissutit tiguneqartut annertunersaat matuma kinguliani issuarneqarput oqaaseqarfigineqarlutillu. Siunnersuutip immikkoortuisa tulleriinneri malillugit tusarniaanermi akissutinut oqaaseqaateqarnissani Ineqarnermut Attaveqarnermullu Pisortaqarfiup naleqqunnerpaatissimavaa.

Siunnersuummi § 1-imut

Illuummik piginnittup illuummi attartortittakkanik inissartaqartumi najugaqartut ikinnerpaaffissaattut aalajangigaasut, inissianik attartukkaminik inissiatut nammineq pigisatut tigusinissamik kissaateqarsimanngippata, illuummik piginnittup inissiat attartortittakkat inissiatut nammineq pigisatut tiguneqarsinnaannginnissaanik aalajangiinissamut periarfissaqartinneqarnissaa Iserit A/S-ip tusarniaanermut akissuteqaammini ujartorpaa.

Peqqussutissatut siunnersuummi inuit amerlanerusut inissianik imminnut pilersorsinnaalernissaat siunertarineqarpoq, taamaattumillu illuummik piginnittup attartortup inissiamik attartortittakkamik najukkaminik tigusinissamik qinnuteqaataanut, attartortut amerlanerusut taamatut kissaateqannginnerat tunngavigiinnarlugu itigartitsisarnissaa kissaatiginanngilaq. Siunnersuummi § 1, imm. 2-mut oqaaseqaatit erseqqissarneqarput.

Siunnersuummi § 3-mut

SIK isumaqarpoq, peqqussutissatut siunnersuut aamma pisortanut, Namminersornerullutik Oqartussani kommuniluunniit atorfeqartinneqarnerminnut atatillugu ineqartinneqartunut tamanut atuutsinneqartariaqartoq. Taakku attartortitsinermit piumasaaqaatit nalinginnaasut tunngavigalugit sulisunut inissiamut innersuunneqartarnerat, taamaattumillu attartortutut allatut pisinnaatitaaffeqartinneqartariaqarnerat SIK-p tamatumunnga tunngavilersuutigaa. SIK-p tamatumunnga atatillugu pisortat taakku, inissianik attartortitsisarneq pillugu Inatsisartut peqqussutaanni § 21-mi maleruagassat malillugit sulisunut inissianik najukkaminik inissiatut nalinginnaasutut tigusinissamut pisinnaatitaaffeqarnerat innersuussutigaa.

Tamatumunnga tunngatillugu erseqqissaatigineqassaaq, allaffinni pisortat akissaateqarfik 36 qaffasinnerusorluunniit malillugu akissaasersorneqarlutik Namminersornerullutik Oqartussani atorfinitsinneqartut, Namminersornerullutik Oqartussani atorfeqartinneqartut, inissiamut innersuunneqarnissamut pisinnaatitaaffeqartut allat assigalugit inissiamut innersuunneqarnissamut pisinnaatitaaffeqarmata, taamaattumillu siunnersuummi aalajangersakkat aamma allaffinni pisortanut inissartinneqartunut atorneqartarlutik. Immikkoortortani pisortat, akissaateqarfik 37 qaffasinnerusorluunniit malillugu akissaasersorneqartut, Namminersornerullutik Oqartussani atorfeqartinneqartut, pisortanut inissianut innersuunneqarsinnaapput, imaluunniit sulisut allat assigalugit sulisunut inissianut innersuunneqarsinnaallutik, tamatumani sulisunut allanut sanilliullutik inissiamik ataatsimik initaqarnerusumik tunineqarnissaaq pisinnaatitaaffigiinnarpaat. Immikkoortortami pisortat pisortanut inissiamut innersuunneqarsimappata, inissianik

attartortitsisarneq pillugu peqqussummi § 21-mi maleruagassat naapertorlugit pisortanut inissiamik inissiatut attartortittakkatut nalinginnaasutut tiguisinnaanngillat, taamatuttaarlu siunnersuut manna tamatumunnga atorneqarsinnaanngilaq. Kisiannili immikkoortortami pisortat sulisunut allanut inissiamut, inissiali initaat ataatsimik amerlaneruinnaartumut innersuunneqarsimappata, siunnersuummi aalajangersakkat aamma immikkoortortami pisortanut inissianut taakkununnga atuutissapput. Aammattaaq inissiat siunertanut aalajangersimasunut immikkoortitaasut inissianik attartortitsisarneq pillugu Inatsisartut peqqussutaanni § 21-mi maleruagassat malillugit inissiatut attartortittakkatut nalinginnaasutut tiguneqarsinnaanngillat, taamatuttaarlu siunnersuut manna inissianut taakkununnga atorneqarsinnaanani.

Tamanna tunngavigalugu naapertuutinngitsumik assigiinngisitsisoqanngitsoq takuneqarsinnaavoq.

Siunnersuummi § 4-mut

Iserit A/S-imit qinnuteqartup tunisinissamut akiusumut pisortanit taarsigassarsititsivigineqanngitsumut akiliisinnaassuseqarneranut aningaaseriviup neriorsuutaanik qinnuteqartup saqqummiussisarnissaa eqqumiiginartinneqarpoq, piffissami qinnuteqarfiusumi tassani qinnuteqartup, tunisisussap aningaaseriviulluunniit tunisinissamut akiusoq ilisimanaviannngimassuk.

Iserit A/S-ip aalajangersimasumik aningaasartalimmik qularnaveequsiisoqartarnissaanik piunasaqaammik aalajangersimasumik atuutsitsisoqalernissaa orniginartippaa.

Tamatumunnga tunngatillugu oqaatigineqassaaq aningaaseriviup neriorsuuteqarneratigut, qinnuteqartup aningaaserivik atukkani peqatigalugu qinnuteqartup inissiamik attartukkaminik illutut inissiatulluunniit nammineq pigisatut tigusinissamut akissaqarnerata ilisimaneqareertarnissaa siunertarineqarmat. Taamaattumik aalajangersimasumik aningaasartalimmik qularnaveequsiisarnissaaq pisariaqanngitsutut naliliiffigineqarpoq, tassani qinnuteqartup inissiamik attartukkaminik illutut inissiatulluunniit nammineq pigisatut tigusinissamut aningaasaqarnikkut periarfissaqarnerata tamakkiisumik naliliiffigineqarnissaa kisimi kissaatigineqarmat.

Iserit A/S-imiit qinnuteqartup inissiamik attartukkaminik inissiatut illutulluunniit nammineq pigisatut tigusiartilluni attartornermut isumaqatigiisummik malinnissimanissaanut piunasaqaateqartoqarnissaa ujartorneqarpoq.

Tamatumunnga tunngatillugu oqaatigineqassaaq, inissianik attartortitsineranut Inatsisartut peqqussutaanni attartortitsisup attartortumut, attartornermut isumaqatigiisummik malinnissimanngitsumut pineqaatissiisarnissaa maleruagassiorneqareemat.

SIK-miit oqaatigineqarpoq, piffissaq sullissiviusoq, soorlu qaammatinut pingasunut killilerlugu maleruagassamik ilanngussisoqartariaqartoq.

Tamatumunnga tunngatillugu oqaatigineqassaaq, piffissaq killilerneqassappat tamanna allaffissornikkut ajornartorsiulerneramik kinguneqarsinnaammat, piffissap sullissiviusup sivilissusissaanut ilaatigut avataani sullissisut, assersuutigalugu piginnittut peqatigiiffianni malittarisassiornermut atatillugu eqqartuussissuserisut suliakkerneqartut apeqqutaasussaammata. Taamaattumik aalajangersakkami piffissap sullissiviusup sivilissusissaanik ilaatitsisoqanngilaq.

SIK aningaaserivimmit qularnaveeqqusiisoqarneranut tunngatillugu aningaaserivik aningaaserivimmit qularnaveeqqusiinermut atatillugu aningaasartuutitut, Naalackersuisunit kommunalbestyrelsimilluunniit matussuserneqartussanut uppersaatit piumasaqarsinnaanersoq pillugu sukumiinerusunik paasisutissinneqarnissaminik kissaateqarpoq.

Tamatumunnga tunngatillugu oqaatigineqassaaq, tamatumani qinnuteqartup aningaasalersuutissanut pisortanit taarsigassarsiaanngitsunut aningaasalersuisinnaaneranut aningaaseriviup nalunaarutaa pisussaaffiliinngitsoq pineqarmat. Tassani aningaaserivimmit qularnaveeqqusiinermut aningaasartuutit, Naalackersuisunit kommunalbestyrelsimillu matuneqartussat suut pineqarnersut erseqqinngilaq, taamaattumillu apeqqutip tamatumunnga tunngasortaa oqaaseqaatit uku aqputigalugit akineqanngilaq.

Siunnersuummi § 5-imut

Aningaasaqarnermut Pisortaqarfik Namminersornerullutik Oqartussat kommuniluunniit inissiarsummi annertunerusumik iluarsaassiniartillugit attartortut qanoq inissisimasarnissaanut maleruagassanik ujartuivoq.

Peqqussutissat siunnersuutip atuutilerneratigut Naalackersuisut kommunalbestyrelsimilluunniit illuutip attartortittakkanik inissartaqartup inissianut nammineq pigisanut immikkoortiterneqarnissaanut piareersaatit isumagisassavaat, kiisalu piginnittut peqatigiiffiini pilersitsiniarnermut aamma piginnittut peqatigiiffiini malittarisassiornermut ikiuuttassallutik. Piginnittut peqatigiiffiisa malittarisassaanni aserfallatsaaliuinissamat illuartsisarnernut tunngassuteqartut malittarisassiunneqartassapput, taamaattumillu tamanna aamma siunnersuummi § 5-imi malittarisassiunneqarnissaa Naalackersuisoqarfimmiit naleqqussorineqanngilaq.

Siunnersuummi § 6-imut

Iserit A/S-imiit najoqqutassat qinnuteqartumut nassiunneqartut aamma illuummi attartortittakkanik inissiertalimmi attartortunut allanut nassiunneqartarnissaat naleqqunnerpaatut isumaqarfigineqarpoq, taamaaliornikkut najoqqutassat tunngaviusut assigiittassammata. Taamaalilluni attartortut tamarmik ataatsikkut inissiamik attartukkaminik inissiatut nammineq pigisatut tigusinissamik neqeroorfigineqartassapput.

Tunisissamat najoqqutassani, qinnuteqartumut nassiunneqartussani tamakkiisuni qinnuteqartup inissiamik attartukkaminik inissiatut nammineq pigisatut

tigusinissamut aalajangernissaanut naammaginantumik tunngavissinneqarnissaa siunertarineqarpoq. Tassanilu attartortitsisup tamanna kissaatigiguniuk, najoqqutassat inissiaqarfimmi attartortut sinnerinut nassiunneqassanersut nammineerluni aalajangigassaraa. Siunnersuummi imm. 3 attartortitsisup minnerpaamik attartortut sinnerinut inissiamik attartortittakkamik tigusisinnaanerannik nalunaaruteqartarnissaatut paasineqassaaq, taamaalilluni inissiaqarfimmi attartortut ilaata inissiamik attartukkaminik inissiatut nammineq tigusisussangornera ilisimatitsissutigineqartassalluni. Tamanna tunngavigalugu imm. 3-mut oqaaseqaatit erseqqissarneqarput.

Siunnersuummi § 8-mut

Iserit A/S-imiit inissiaqarfimmi attartortup siulliup inissiamik attartukkaminik tigusinerata kingorna inissiaqarfimmi tunisinissamut piumasaqaatinik aalajangersaasoqarnissaa ujartorneqarpoq. Tamatumunnga ilanngullugu illuummik naliliineq qanoq ittoq tunngavigineqassanersoq pillugu, kiisalu attartortup piffissap attartorfigisaata naatsorsorneranut malittarisassanik ersarissunik suliaqartoqarnissaa Iserit A/S-imit kissaatigineqarpoq. Tamatuma peqatigisaanik attartortup neqeroorutaaqqaartoq allanngortinnagu akuersinissaanut sivisunerpaamik ukiumut ataatsimut killiliisoqarnissaa Iserit A/S-ip ujartorpaa.

Siunnersuummi § 11, imm. 1-imi tunisinissamut akiusup aalajangerneqarnerani niuernikkut naligititaasup atorneqartarnissaa allassimareerpoq. Tassanilu piffissami tunisiffiusumi niuernikkut naligititaasoq pineqarpoq, tamannalu aalajangersakkamut oqaaseqaatini erseqqissarneqarpoq.

Iserit A/S-imiit oqaaseqaatit kingunerisaannik siunnersuummi § 11, imm. 2-mut oqaaseqaatit erseqqissarneqarput, taamaalillunilu maanna inissiami attartortittakkami attartortup piffissap attartorfigisaata piffissami attartornermut isumaqatigiissuteqarfiusumiit aallartilluni attartortup inissiamik najukkaminik inissiatut nammineq pigisatut tigusinerata tungaanut naatsorsorneqartarnissaa ersarissumik allassimalerpoq.

Kiisalu siunnersuummi § 11, imm. 3-mut oqaaseqaatit erseqqissarneqarput, taamaalillunilu tunisinerni tamani tunisineranut akiusumut 50.000 koruunit, tunisineranut atatillugu aningaasartuutitut matussutissatut ilaliunneqartarnissaat ersarissumik allassimalerpoq.

Siunnersuummi § 9-mut

SIK-miit aalajangersagaq naapertuutinngitsutut isumaqarfigineqarpoq, SIK-miit isumaqartoqarmat aalajangersagaq inuit, inissiamik namminneq pigisassaminnik pisinissamut akissaqanngitsut periarfissaannut akornutaasoq. Kiisalu SIK-miit inatsisitigut inissisimaneq, inuit kikkulluunniit ineqartinneqarnissamut pisinnaatitaaffeqarnerannut tunngasoq innersuussutigineqarpoq.

Tassani erseqqissarneqassaaq aalajangersagaq taamaallaat inissianut attartortittakkanut inoqanngitsunut atuummat, tassalu attartortuusimasup inissiamik

qimatseererneranut atuulluni. Inissiamik attartortittakkamik inoqanngitsumik tunisinissaq aatsaat pissaaq. Naalakkersuisut kommunalbestyrelsilluunniit inissiap attartortittakkaq inissiatut attartortittakkatut atorneqaannarnissaa kissaatiginngipassuk. Naalakkersuisunit inatsisitigut inissisimaneq, kikkulluunniit ineqartinneqarnissamut pisinnaatitaaffeqarnerannut tunngasooq ilisimangilaat.

Siunnersuummi § 11-mut

Iserit A/S-imit illuni ilaqutariinnut ataatsinut inissiani illunilu affarleriinni attartortut inissiaruarni attartortutut pisinermut akiusumut akikillisaanneqarnissamut periarfissaqartinneqannginnerat eqqumiiginartinneqarpoq. Iserit A/S isumaqarpoq, suliat eqqarsaatigalugit assigiinngisitsinissamut tunngavissaqanngitsoq. Iserit A/S-ip erseqqissaatigaa aaqqissuussinerup illoqarfinni minnerni nunaqarfinnilu attartortut, aaqqissuussinernik aningaasaqarnikkut iluanaarnarnerpaanik pisariaqartitsinerpaasut eqqortussaassagai. Tamatumunnga peqatigitillugu aaqqissuussineq aqqutigalugu illuutinik piginnittut, illoqarfinni minnerni nunaqarfinnilu illunik ilaqutariinnut ataatsinut inissianik illunilu affarleriinnik pigisaqartut pillarneqartussaapput, taakkunani illut aserfallatsaaliussallugit akisunerusarmata ajornarnerusarlutillu.

Tamatumunnga atatillugu oqaatigineqassaaq, illut ilaqutariinnut ataatsinut inissiat illullu affarleriit ilaqutariinnut arlalinnut inissiaruarni atuutinngitsutut oqaatigineqarsinnaasumik alianaassutsikkut naleqarmata, taamaattumillu illunik ilaqutariinnut ataatsinut inissianik illunilu affarleriinnik tunisinermut atatillugu akikillisaasiisoqarniarani.

Iserit A/S-imit siunnersuutigineqarpoq, tunisinermut atatillugu aningaasartuutitut akiliutissaq aalajangersimasooq 50.000 koruuniusooq akit ineriartornerat malillugu iluarsineqartassasooq.

Tamatumunnga tunngatillugu oqaatigineqassaaq, akiliutissap aalajangersimasooq 50.000 koruuniusooq aqukkuminarnera pequtigalugu allanngortinneqannginnissaa kissaatigineqarmat.

Aningaasaqarnermut Pisortaqarfik isumaqarpoq, pisinermut akiusumut appaatissaq, attartortup attartortuunerata sivilissusaa apequtaatillugu procentilerneqartoq pitsaanngitsumik pilerisaarutaasooq, tamatumalu kingunerisaanik attartortup akiusumut appaatissaq annerpaaq anguniarlugu inissiamik attartortuuginnarsinnaasooq. Taamaattumik Aningaasaqarnermut Pisortaqarfik tunisinermut akiusumut akikillisaanissami attartortup inissiamik attartortuunerata sivilissusaata apequtaatinneqarnissaanut tunngavissamik ujartuivoq.

Oqaaseqaatit allanguinissamut tunngavissiisimangillat, iluanaarniarnissamut tunngasut eqqortumik nassuiarneqartut naalakkersuisooqatigiinnissamut isumaqatigiissut eqqarsaatigalugu ilanngunneqarsimmata, tassanilu allassimavoq attartortut Namminersornerullutik Oqartussat kommunilluunniit inissiaataanni attartortittakkani ukiorpassuarni najugaqarsimasut eqqarsaatigineqassasut. Attartortut taakku inissianik attartukkaminik inissiatut nammineq pigisatut tigusinerminni iluaqutissanik angusaqarsinnaassapput. Siunnersuummi § 11, imm. 2-mut

oqaaseqaatini assersuutigineqartut malillugit innuttaasuni amerlasuut kajumissaarneqartussaapput. Kajumissaarutip pitsaasuunnginneranik oqarneq eqqortuunngilaq, tassami niuernikkut akigititaasussatut naatsorsuutigineqartut iluaqutaasussanut apeqqutaasussaapput. Ineriartornissamut siunissaq apeqqutaasussaammat, tamatumani eqqoriaasoqarsinnaanngilaq.

Siunnersuummi § 13-mut

Iserit A/S-imiit siunnersuutigineqarpoq akit nikingassutaannut qularnaveeqqusiissutikkut iluarsaassinermut taarsigassarsinissaq ammaanqartassasoq.

Tamatumunnga atatillugu erseqqissarneqassaaq, aalajangersakkap maannatut iluseqarluni atuutiinnarnissaa kissaatigineqarmat, akit nikingassutaannut qularnaveeqqusiissut, attartortup inissiamik attartukkamik inissiatut illutulluunniit nammineq pigisatut tiguseranarut atatillugu Namminersornerullutik Oqartussanut kommunitulluunniit taarsigassarsiat akilereernerini akileneqartussatut inissisimanissaa taamaallaat siunertaqarfigineqarmat.

Siunnersuummi § 15-mut

Iserit A/S-imit siunnersuutigineqarpoq Namminersornerullutik Oqartussanit kommunitulluunniit taarsigassarsinermi iluarsaassinermut taarsigassarsinissaq ammaanqartassasoq.

Tamatumunnga atatillugu erseqqissarneqassaaq, aalajangersakkap maannatut iluseqarluni atuutiinnarnissaa kissaatigineqarmat.

Peqqussutissatut siunnersuummi aalajangersakkanut ataasiakkaanut oqaaseqaatit

§ 1-imut

Imm. 1-imut.

Aalajangersakkami siunnersuutip atuuffissai nassuiarneqarput. Imm. 2-mi aamma § 3-mi pineqartussaannngitsutut taaneqartut eqqaassanngikkaanni, Namminersornerullutik Oqartussat kommunillu inissiaataanni attartortittakkani inuk attartortoq pineqartillugu peqqussut tamanut atuuttussaavoq. Taassuma atuutilerneratigut ilaatigut inatsisitigut pisinnaatitaasut pisussaataasullu attartortuusimasinnaasut aaqqissuussinermik atuisinnaajunnaassapput.

Aalajangersakkap atuarneqarnerani § 2 ilanngullugu atuarneqassaaq, tassanilu inissiaateqarfimmi attartortittakkami inissiat qaqugukkut inissiatut illutulluunniit nammineq pigisatut tiguneqarsinnaanersut nassuiarneqarpoq. Taamaalilluni

peqqussummi aalajangersakkat ilaat inissianut nammineq pigisanut imaluunniit illunut nammineq pigisanut atorneqarsinnaassapput, aalajangersakkallu allat ineqariaatsinut taakkununnga marluusunut atorneqarsinnaassallutik.

Imm. 2-mut

Aalajangersakkami imm. 1 eqikkarneqarpoq, taannalu malillugu Naalakkersuisut kommunalbestyrelsillu iluaqutaasumik inissiaateqarfiit attartortittakkanik inissiertallit arlaat tunineqartussatut kissaatigineqarnersut aalajangersinnaavaat. Tassani tunngavissaq pingaarneq tassaassaaq inissiaateqarfiit attartortittakkanik inissiertallit tamarmik tunngavimmikkut tunineqartussatut kissaatigineqarnerat, tamannalu siunnersuummi anguniakkamut pingaarnermut naapertuuppoq, kisiannili assersuutigalugu inissiaateqarfiit attartortittakkanik inissiertallit, iluarsartuussinissamut isaterinissamulluunniit immikkut pilersaaruteqarfigineqartut pinngitsoorneqarsinnaallutik. Tassani inissiaateqarfinni attartortittaakkanik inissiertalinni inissianik imaluunniit illunik nammineq pigisassatut tigusinissap pineqarnera apeqquataatinnagu aalajangersagaq atuutissaaq.

Aalajangersakkap atuutilerneratigut attartortup inissiaqarfimmi attartortuni kisiartaalluni inissiamik attartukkaminik inissiatut nammineq pigisatut tiguserusunni peqqutiginnarlugu inissiamik attartortittakkamik inissiatut nammineq pigisatut tiguisinnaaneranut periarfissaqarnera killilersorneqanngilaq.

§ 2-mut

Aalajangersakkami Namminersornerullutik Oqartussat kommunillu inissiaataasa attartortittakkat inissiatut nammineq pigisatut tiguneqarsinnaanerat aalajangersarneqarpoq, tassanilu pineqartut tassaapput inissiaateqarfiit attartortittakkanik ataatsimiit amerlanerusunik inissiertaqartut, imaluunniit inissiaateqarfiit attartortittakkamik ataatsimik inissiertaqartut. Taamatut killiliineq peqqusutip atuarneqarnissaanut pingaaruteqartorujussuuvoq, peqqussummi aalajangersakkat ilaat taamaallaat inissianut imaluunniit illunut nammineq pigisanut atorneqarsinnaammata, aalajangersakkallu ilaat ineqariaatsinut taakkununnga marluusunut tamaginnut atorneqarsinnaallutik.

Aalajangersakkami killiliussat atulernerisigut illut ilaqutariinut ataatsinut inissiat kisimik illutut nammineq pigisatut immikkoortinneqarput.

Ineqariaatsit allat tamarmik inissianut nammineq pigisanut inissinneqarput. Tassanilu pineqartut tassaapput illuni affarleriinni, illuni uiguleriinni aamma inissiarsuarni inissiat.

§ 3-mut

Imm. 1-imut

Aalajangersagaq inissiat peqqussummi ilaatinneqanngitsut taagorneqarnerinik imaqarpoq. Inissiat taamaattut immikkut ittumik inissinneqarnissaannik pingaarnertut siunertaqarneq eqqarsaatigalugu peqqussummi ilaatinneqartussaannngitsut ilanngullugit taaneqarput. Inissianik pineqartunik tiguisinnaanermut imaaliallaannaq pisinnaatitaaffiliisoqassappat, tamanna ataasiakkaanut naapertuutinngitsumik iluanaarnaateqarsinnaavoq, kiisalu pisuni allani inissiat aalajangersimasut imaaliallaannarlutik tunineqarsinnaassallutik.

Imm. 2-mut

Naalackersuisut kommunalbestyrelsilu inissiat najugarineqartut ataasiakkaat, § 3, imm. 1, nr. 5-imi taaneqartut inissiatut illutulluunniit nammineq pigisatut tiguneqaannarsinnaanerata aalajangersinnaavaat.

Innarluutilinnut inissiat tunngaviatigut ilaatinneqannginnerinut pequtaasoq tassaavoq, Namminersornerullutik Oqartussat kommunillu nalinginnaasumik inissiani taamaattuni atortunut assigiinngitsunut annertuunik aningaasaliissuteqartarmata, aammalu inissiat taamaattut siunissami siunertamut tamatumunnga atorneqaannarsinnaasariaqarmata.

Ingerlaavartumik tunineqartassappata tamanna anguneqarsinnaassanngilaq. Taamaattumillu inissianik nutaanik pisiortortoqartuassappat, inissiallu pisiarineqartut immikkut ittumik ilusilersorneqartassappata, tamanna allaffissornikkut aningaasaqarnikkullu annertuumik sunniateqartussaavoq.

Taamaattumik assersuutigalugu inissiaq pineqartoq innarluutilinnut inissiatut immikkoortitaagaluarluni immikkut ilusilersugaanngippat naleqqussagaanngippalluunniit aalajangersakkap atorneqarnissaa naatsorsuutigineqarpoq. Tassalu inissiaq pingaartumik inissiamut attartortittakkamut nalinginnaasumut assingusuusaaq, taamaattumillu peqqussummi ilaatinneqartariaqarluni. Assersuutigalugu inissiaq attartortittagaq innarluutilinnut inissiatut immikkoortinneqarsimasinnaavoq, inissiami inini allerni inissisimasuunera pissutigiinnarlugu.

§ 4-mut

Imm. 1-imut

Aalajangersakkami tigusinissamut suliap qanoq iliorluni aallartinneqarnissaa nassuiarneqarpoq. Aalajangersakkami tamanna qinnuteqarnikkut pissasoq, kisiannili tamatuma tunngaviummik immikkut piunasaqaatitaqannginnera nassuiarneqarpoq.

Tassanili pingaaruteqarpoq qinnuteqartup pisortanit taarsigassarsiarititassat saniatigut aningaasalersuutissanik pissarsinissamut periarfissaqarnera pillugu aningaaserivimmiit uppernarsaatip pisussaaffiliinngitsup qinnuteqaammut ilanngunneqarnissaa. Uppernarsaat ilanngunneqanngippat Naalackersuisut kommunalbestyrelsiluunniit qinnuteqaammut itigartitsissapput, taamaalillunilu

qinnuteqartup qinnuteqaanni uppersaammik pineqartumik ilaqartillugu nassiateqqittariaqassavaa.

Uppersaammik ilanngussinissamik piunasaqaateqarneq tunngaveqarpoq tigusinissamik piviusunngortitsiniarluni suliaqalernerme allaffissornikkut suliarujussuit aallartinneqartarnerat. Misilittakkat takutippaat pisinissamut neqeroorut inaarutaasoq atsiugassanngorluni piareeraangat qinnuteqartut arlallit tigusinissamik naammassinnissinnaasannigitsut. Tamanna amerlanertigut qinnuteqartup siusissukkut aningaaserivimmik qinnuteqartup aningaasaqarneranik naliliisitsilluni suliamut ilanngussititsisimanninneranik peqquteqartarpoq. Uppersaamat pisussaaffiliinngitsoq qinnuteqartup inissiamik najukkaminik inissiatut illutulluunniit nammineq pigisatut tigusinissamut periarfissaqarneranut Naalackersuisunut kommunalbestyrelsimulluunniit aamma qinnuteqartumut pitsaaneruseq qulakkeerisuusavaoq.

Siunnersuummi takuneqarsinnaasutut qinnuteqartup aningaaseriviata uppersaasiussaa pisussaaffiliinngilaq. Tassani tunisinissamut akiusoq suli aalajangerneqarsimasussaannigilaq, taamaattumillu uppersaamat taamaallaat qinnuteqartup aningaasaqarneranut tamakkiisumut tunngasuvoq, qinnuteqartup inissiamik pineqartumik aningaasalersuisinnaaneranut aningaasaqarnikkut periarfissaqarneranut tunngasuunani.

§ 5-imut

Imm. 1-imut

Aalajangersakkami Naalackersuisut kommunalbestyrelsiluunniit inissiateqarfimmi inissiat attartortittakkat inissiatut nammineq pigisatut tiguneqarnissaannut piareersarnissamut pisussaaffilerneqarput, tassunga ilaallutik inissianik agguataarinissaq, agguaqatigiisitsinermi kisitsisinik tunngaviusussanik aalajangersaanissaq aamma Kalaallit Nunaanni Eqqartuussivimmi nalunaarsuinissaq.

Inissiateqarfimmi ataaseq sinnerlugu inissiarqartuni piginnittut peqatigiiffiinnik tamatigut pilersitsisoqartussaassaaq kiisalu malittarisassiorqartussaassalluni. Attartortut arlallit qinnuteqaammik nassiussinissartik sioqqullugu piginnittut peqatigiiffiannik pilersitsisimannigippata, aammalu malittarisassanik aalajangersaasimannigippata, Naalackersuisut kommunalbestyrelsiluunniit tamatumunnga ikiutissapput.

Inissiateqarfimmi attartortittakkanik inissiarqartuni attartortut tamarmiullutik inissianik attartukkaminik inissiatut nammineq pigisatut tigusinissaminik kissaateqarsimannigippata, Namminersornerullutik Oqartussat kommuniluunniit inissianik nammineq pigisanik sinneruttunik piginnittutut ingerlaannarnermik kingunerisaanik piginnittut peqatigiiffiannut ilaasortannguinnassapput.

Imm. 2-mut

Aalajangersakkami Naalackersuisut inissiaateqarfinni inissianik attartortittakkanik agguataarisarneq pillugu sukumiinerusunik maleruagassiorsinnaanermut tunngavissinneqarput, taakkununga nalunaarsuisarnermi pissutsit piginnittunullu immikkut piumasaqaatit ilaatinneqarlutik.

Inissiaateqarfinni inissiat attartortittakkat agguataarneqartarnerinut atatillugu agguataarinissap soorlu naliliisartumit, nuna tamakkerlugu inspekturimit imaluunniit illunik tuniniaasartumit isumagineqarnissaanut aalajangiisarnermut aalajangersakkap atorineqarnissaa eqqarsaatigineqarpoq. Nalunaarsuisarnermut atatillugu Naalackersuisut ataatsimut atortulersuutit illunut allanut atasut imaluunniit biilinit unittarfeqarnermi pissutsit immikkut ittut nalunaarsorneqarsinnaanissaannik kissaateqarnissaat eqqarsaatigineqarsinnaavoq. Kiisalu Naalackersuisut piginnittunut piumasaqaatinik immikkut ittunik aalajangersaanissamut periarfissaqartinneqassapput, tassanilu aalajangersimasunik periaaseqarluni aputaajaasarneq pillugu piumasaqaatit pineqarsinnaapput.

§ 6-mut

Imm. 1-imut

Aalajangersakkami najoqqutassat qinnuteqartumut nassiunneqartussat taagorneqarput. Najoqqutassat pissarsiariniartarnerat allaffissornermi annertuunik suliaasartaqartarmat, qinnuteqaatip tigungeraniit najoqqutassat qinnuteqartumut nassiunneqarnissaannut nalinginnaasumik qaammataluit ingerlasinnaapput.

Najoqqutassat annertuut nassiunneqartarnerannut siunertaavoq qinnuteqartup Naalackersuisut imaluunniit kommunalbestyrelsip neqeroorutaanik akuersissanerluni naliliiniarnermini aalajangernissaminut naammattunik tunngavissaqarnissaa.

Inatsisitigut pisussaaffioreersunut naleqqiullugu maanna illumut nassuiaammik immersuisoqartartussanngorpoq. Illumut nassuiaammi illup qanoq innera nassuiarneqassaaq. Nassuiaasiornermi illup pisoqaassusiata, pequsersugaanerata, illup ilaasa qanoq innerisa, atortulersuutaasa uuttuutaasalu uppernarsaaserneqarnissaat siunertarineqarpoq. Paasissutissat taakku attartortup niuernerme akigititassamut sanilliussinnaavai, pisinissamillu aalajangernissamut tunngavigisinnaallugit. Assersuutigalugu illu oqorsaateqarpat tamanna nassuiaammi takuneqarsinnaavoq, kisiannili oqorsaataa qanoq issutiginersoq qanorlu innersoq takuneqarsinnaanani. Teknikkikkut aningaasatigullu naligititaasoq maannamut atorineqartoq qanoq issutsimik nalunaarsuinerme paarlaanneqakkajuttarsimavoq, taamaattuunanilu. Teknikkikkut aningaasatigullu naligititaasoq tassaavoq sanaqqinneqarnerata akia, ajorseriaatit, aserfallatsaaliuisimannginneq nalikilliliissutillu ilanngaatigalugit. Illumut nassuiaat nutaaq tassaavoq pioreersutulli illumi soqarnersoq pillugu paasissutissat. Attartortoq pisussaavoq inissiap pitsaassusaa ilisimaareriissallugu, tassami attartortoq inissiami ineqartooreerami taassumalu pitsaassusaa ilisimariissallugu.

Imm. 2-mut

Najoqqutassat qinnuteqartumut nassiunneqartussat tigusinissamut neqerooruterpiamik ilaqartinneqassapput. Qinnuteqartoq neqeroorutip nassiunneqarneranit qaammatit pingasut iluanni neqeroorummut akuersisimanngippat, Naalakkersuisut imaluunniit kommunalbestyrelsip qinnuteqartup tigusinissamik siunertaqannginneranik naatsorsuuteqarnissaq pisinnaatitaaffigaat. Akissuteqarnissamut killissarititaasut qaammatit pingasut qaangiunneranni Naalakkersuisut imaluunniit kommunalbestyrelsip neqerooruteqarnerminni pisussaaffii atorunnaassapput.

Imm. 3-mut

Aalajangersagaq manna qinnuteqartup saniatigut inissiaateqarfimmi attartortittakkanik inissiaartaqartumi attartortut sinnerinut saaffiginnittuuvoq. Attartortut taakku inissiamik tigusiariartutik suliniummik aallartitsisimannginnamik, najoqqutassat qinnuteqartumut nassiunneqartut amerlaqataannik nassiussivigineqassanngillat. Taamaattorli attartortitsisup najoqqutassat attartortitsisup attartortumut nassiussimasai taakku attartortut sinnerinut nassiutissanerlugit nammineerluni aalajangissavaa, tak. imm. 1, kisiannili attartortitsisup tamanna pisussaaffiginngilaa. Aalajangersakkap atuutilerneratigut attartortut minnerpaamik suliniut ingerlasoq pillugu ilisimatinneqassapput, tassunga ilanngullugu inissiamik attartukkaminnik inissiatut nammineq pigisatut tiguisinnaanerannut periarfissaannik ilisimatinneqassallutik.

§ 7-imut

Imm. 1-imut

Aalajangersakkami attartortut sinneruttut, inissiamik attartukkaminnik inissiatut nammineq pigisatut tigusinissamik kissaateqanngitsut periarfissaat maleruagassiunneqarput. Tassani aalajangersakkap inissianik attartortitsisarneq pillugu Inatsisartut peqqussutaannut, attartortut sinneruttut pisinnaatitaaffiinik pisussaaffiinillu maleruagassiorfiusumut sukkulluunniit atuuttumut ilanngullugu atuarneqarnissaa pingaaruteqarpoq.

Aalajangersakkami attartortoq illuummi attartortut ingerlaannarnissamik imaluunniit Naalakkersuisut kommunalbestyrelsilluunniit illoqarfimmi najukkami inissiamut attartortittakkamut allamut neqeroorutaanut akuersinissamik qinigassinneqarpoq. Attartortoq kingulliullugu taaneqartumik periarfissaqarnerasoq inissianik attartortitsisarneq pillugu Inatsisartut peqqussutaanni tamatumunnga pisinnaatitaaffiliinerit apeqqutaapput. Assersuutigalugu attartortup ineqarnermut akiuliutinik piffissaq eqqorlugu akiliisannginnermigut attartornermut isumaqatigiissut sumiginnarsimappagu, attartortoq illoqarfimmi najukkamini inissiamik attartortittakkamik allamik neqeroorfigineqarsinnaanngilaq. Taamaattorli attartortitsisup pissutsit pingaaruteqanngitsut imaluunniit attartortumit iluarsineqareersimasut pissutiginiarsinnaanngilai.

Imm. 2-mut

Aalajangersagaq imm. 1-imitut inissianik attartortitsisarneq pillugu Inatsisartut peqqussutaannut innersuussummik toqqaannangitsumik imaqarpoq, taannalu malillugu inissiaateqarfinni Namminersornerullutik Oqartussat kommunilluunniit inissianik pigisaqarfignissaanni ineqarnermut akiliutissat naatsorsorneqartarnerat allassimavoq.

Imm. 3-mut

Aalajangersakkap atuutilerneratigut attartortunit sinneruttut piginnittut peqatigiiffianni, toqqaannangitsumik ilaaffigilikkaminni torersaarnissamut maleruagassanik ataqqinninnissamut pisussaatinneqalissapput. Aalajangersagaq ilanngunneqarpoq, piginnittut peqatigiiffii malittarisassiaminni torersaarnissamut maleruagassanik inissianik attartortitsisarneq pillugu Inatsisartut peqqussutaanni atuutisneqartunit sukannernerusunik aalajangersaasinnaammata. Taamatut pisoqartillugu attartortunit sinneruttut maleruagassanut sukannernerusunut akuersaartussaapput, taamaalillutillu attartornermi pissutsinut pisinnaatitaaffiit atukkatik annikinnerulernerat naammagiinnartussaallugu.

Illoqarfinni annerusuni inissiat ilusilersugaanerat, kiisalu attartortumiit piginnittumut aaqqissuussinermi pingaarnertut siunertarineqartut peqqutigalugit aalajangersakkami piginnittut peqatigiiffii, najugaqarfimmi avatangiisinik peqqinnartunik eqqissisimanartunillu pilersitserusuttut tapersorsorneqarput. Attartortunit sinneruttut ataasiakkaat amerlanerussuteqartunut akornusersuisarpata, taakku peersinneqarsinnaassapput.

§ 8-mut

Aalajangersakkami attartortut inissiamik attartortittakkamik najukkaminnik inissiatut nammineq pigisatut tiguisinnaanermut periarfissaqarnerannik nalunaarsorneqarsimasut, taamatut periarfissaqarnerminnik piffissamut killiligaanngitsumut atuisinnaanerat aalajangersarneqarpoq. Kisiannili attartortoq inissiamik allamik neqeroorfigineqarnermini akuersisimaguni, inissiap tigunissaanut neqeroorummut akuersinissaminut periarfissani annaassavaa.

Aalajangersakkap atuutilerneratigut attartortut sinneruttut kissaatigippassuk Naalakkersuisut kommunalbestyrelsilu tunisinissamik isumaqatigiissuteqarnissamik pisussaataalissapput.

Tunisinissamut atugassarititaasut sukumiinerusut siunnersuummi aalajangersakkani allani malittarisassiunneqarput, tassunga ilanngullugu tunisinermit akiusoq siunnersuummi § 11 malillugu aalajangerneqassalluni.

§ 9-mut

Imm. 1-imitut

Aalajangersakkami pineqarput ilaatigut attartortup inissiamik najukkaminik nalinginnaasumik qimatsinera ilaatigullu attartortunit sinneruttup inissiamut allamut nuunnissamik Naalakkersuisut imaluunniit kommunalbestyrelsip neqeroorutaanik akuersaarnera.

Naalakkersuisut imaluunniit kommunalbestyrelsip inissiat attartortittakkat inoqanngitsut inissiatut attartortittakkatut atorneqaannarnissaat kissaatiginngikkunikku tunisinnaavaat.

Naalakkersuisut imaluunniit kommunalbestyrelsip piginnittut inissiap attartortittakkap qanoq atorneqarnissaa aalajangersinnaavaat. Inissiaq inoqanngitsoq tamanut ammasumik tuniniarneqassappat assersuutigalugu aviisini allagarsiinikkut qaffasinnerpaamik akiliiumasumut tuniniaasoqarsinnaavoq. Tunisineq aamma inissiaq attartortittagaq illunik tuniniaasartoq niuernermi akiumik aalajangiisussaasoq aqutigalugu tamanut ammasumik pisinnaavoq. Pisisup tunisinnermut atatillugu aningaasartuutit tamaasa akilissavai.

Imm. 2-mut

Tamanut ammasumik tuniniaaneq siunnersuummi § 11-mi pineqartunut ilaanngitsoq naqissuserniarlugu aalajangersagaq ikkunneqarpoq, tunisinnermi akiusoq imm. 1 naapertorlugu aalajangersarneqartussaammat. Qanoq siviisutigisumik attartortuusimaneq tunngavigalugu tunisinnermi akiumut akikillisaasoqassanngitsoq pissusissamisoorpoq, inissiaq attartortittagaq inoqanngimmat.

§ 10-mut

Imm. 1-imut

Aalajangersakkami inissiaateqarfiit attartortittakkanik inissiatallit illutut nammineq pigisatut tiguneqartussat kisimik pineqarput. Naalakkersuisut imaluunniit kommunalbestyrelsi illumik nammineq pigisassatut tigusinissamik qinnuteqaatip akuerineqarnerani suut qinnuteqartumut nassiunneqassanersut aalajangersakkami aalajangersarneqarpoq.

Najoqqutassat nassiunneqartarnerannut siunertaavoq qinnuteqartup Naalakkersuisut imaluunniit kommunalbestyrelsip neqeroorutaanik akuersissanerluni naliliiniarnermini aalajangernissaminut naammattunik tunngavissaqarnissaa.

Inatsisitigut pisussaaffioersunut naleqqiullugu maanna illumut nassuiaatit immersorneqartartussanngorput. Illumut nassuiaat illup qanoq inneranut nassuiaataasussaavoq. Nassuiaasiornermi ilaatigut illup pisoqaassusaanut, pisatsersugaaneranut, illup ilaata qanoq inneranut, atortulersuutitut uuttuutinullu uppersaasiinissaq siunertarineqarpoq. Paasissutissat taakku attartortup niuernermi akigititaasumut sanilliussinnermut atorsinnaavai, pisinissamillu aalajangernissamut tunngavigisinnaallugit. Assersuutigalugu illu oqorsaaserneqarsimasoq nassuiaammi takuneqarsinnaavoq, oqorsaataali qanoq issutiginersut qanorlu innernut

takuneqarsinnaangilaq. Teknikkikkut aningaasatigullu naligititaasoq maannamut atorneqartoq qanoq issutsimik nalunaarsuinermit paarlanneqakkajuttarsimavoq, taamaattuunanilu. Teknikkikkut aningaasatigullu naligititaasoq tassaavoq sanaqqinneqarnerata akia, ajorseriaatit, aserfallatsaaliuisimanginneq nalikilliliissutillu ilanngaatilugit. Illumut nassuiaat nutaaq tassaavoq pioreersutulli illumi soqarneraq pillugu paasisutissat. Attartortoq pisussaavoq inissiap pitsaassusaa ilisimaarissallugu, tassami attartortoq inissiami ineqartooreerami tassumalu pitsaassusaa ilisimareriissallugu.

Imm. 2-mut

Najoqqutassat qinnuteqartumut nassiunneqartussat tigusinissamut neqerooruterpiamik ilaqartinneqassapput. Qinnuteqartoq neqeroorutip nassiunneqarneranit qaammatit pingasut iluanni neqeroorummut akuersisimangippat, Naalakkersuisit imaluunniit kommunalbestyrelsip qinnuteqartup tigusinissamik siunertaqannginneranik naatsorsuuteqarnissaq pisinnaatitaaffigaat. Akissuteqarnissamut killissarititaasut qaammatit pingasut qaangiunneranni Naalakkersuisit imaluunniit kommunalbestyrelsip neqerooruteqarnerminni pisussaaffii atorunnaassapput.

§ 11-imut

Imm. 1-imut

Aalajangersagaq nutaajuvoq, aammalu attartortumiit piginnittumut aqqissuussineq pillugu Inatsisartut peqqussutaannut atuuttumut naleqqiullugu tunisinermi akimik aalajangersaariaatsimut nutaamut takussutissiaalluni. Tunisinermut akimik naatsorsueriaatsimi nutaami 2006-imi Inatsisartut ukiakkut ataatsimiinneranni aalajangiiffigisassatut siunnersuutip nr. 87-ip suliarineqarneranut atatillugu oqallinneq tungavigineqarpoq. Inissiamut attartortittakkamut tunisinermi akigititaasoq tamatuma kingorna tamatigut niuernerminni naligititaasumut aalajangerneqartassaaq.

Imm. 2-imut

Ataatsimut isigalugu aalajangersakkap atuutilerneratigut tunisinermi akinik aalajangersaasarnermi attartortup ukiut inissiamik attartorfigisai eqqarsaatigineqartassapput. Aalajangersagaq malillugu tamanna inissiani attartortittakkani inissiaatinik pingasunik amerlanerusunilluunniit attartortittakkanik inissialtinnit taamaallaat atuutissaaq. Attartortup piffissaq attartortuuffigisaa malillugu akikillisaasiisarneq attartortunut, inissianik attartukkaminik inissiatut nammineq pigisatut tigusinissaannut kajumissaarutitut ilanngunneqarpoq. Procentinngorlugu akikillisaanermi ilanngussaq 2-imi takuneqarsinnaasutut attartortup inissiami pineqartumi qanoq sivistigisumik attartorsimanera apeqqutaatinneqartassaaq. Piffissaq attartorfiusoq attartornermut isumaqatigiissutip aallartinneraniit attartortup inissiamik attartukkaminik inissiatut nammineq pigisatut tigusinerata tungaanut naatsorsorneqassaaq. Attartortoq inissiami atasuinnarmik

ukiut tallimat sinnerlugit najugaqarsimappat aatsaat tunisinermi akiusumut akikillisaasoqartassaaq. Procentinngorlugu akikillisaaneq aningaasartassatut annertussuserititassatut aalajangersakkanik killilerneqarpoq.

Aalajangersakkami imm. 2 aamma ilanngussaq 2 tunngavigalugit assersuusiat uku takussutissatut atorneqarsinnaapput:

1) Ilaqutariinnut arlalinnut inissiani inissiaq pingasunik initalik, 965.000 koruunik akeqartutut naliliiffigineqartoq.

Attartortoq ukiut 13-it 14-illu akornanni inissiami najugaqarsimavoq, taamaattumillu ilanngussaq 2 naapertorlugu 21%-inik akikillisaavigineqassaaq.

965.000 koruunit 21%-ii 202.650 koruuniupput.

Aalajangersakkami imm. 2, nr. 2-imi takuneqarsinnaasutut inissiap pingasunik initalip akianut akikillisaatissaq annerpaamik 335.000 koruuniusinnaavoq. 965.000 koruunit 21%-iat annertunerpaaffissatut killiliussap iluaniimmat akikillisaatissaq 202.650 koruuniuvoq.

Tunisinermi akiusoq 965.000 kr.
- akikillisaatissaq 202.650 kr.
+ suliambut aningaasartuutit 50.000 kr.
Tunisinermut aki aalajangiunneqartoq 812.350 kr.

Taakkunanga 40%-it imaluunniit 324.940 koruunit ukiuni 20-ni erniaqanngitsutut taasersugassaanngitsutullu taarsigassarsiaritinneqassapput. 60%-it sinneruttut, tassalu 487.410 koruunit tunisisumut akilerneqassapput.

2) Inissiani uiguleriinni inissiaq sisamanik initalik, 1.175.000 koruunik akeqartutut naliliiffigineqartoq.

Attartortoq ukiut qulingiluat qulillu akornanni inissiami najugaqarsimavoq, taamaattumillu ilanngussaq 2 naapertorlugu 13%-inik akikillisaavigineqassaaq.

1.175.000 koruunit 13%-ii 152.750 koruuniupput.

Aalajangersakkami imm. 2, nr. 3-imi takuneqarsinnaasutut inissiani uiguleriinni inissiap sisamanik initalip akianut akikillisaatissaq annerpaamik 445.000 koruuniusinnaavoq. 1.175.000 koruunit 13%-ii taakku annerpaaffissatut killiliussat iluanniimmata, akikillisaatissat 152.750 koruunik annertussuseqassapput.

Tunisinermi akiusoq 1.175.000 kr.
- akikillisaatissaq 152.750 kr.
+ suliambut aningaasartuutit 50.000 kr.
Tunisinermut aki aalajangiunneqartoq 1.072.250 kr.

Taakkunanga 40%-it imaluunniit 428.900 koruunit ukiuni 20-ni erniaqanngitsutut taarsersugassaanngitsutullu taarsigassarsiaritinneqassapput. 60%-it sinneruttut, tassalu 643.350 koruunit tunisisumut akilerneqassapput.

3) Ilaqutariinnut arlalinnut inissiani inissiaq tallimanik initalik, 1.800.000 koruuninik akeqartutut naliliiffigineqartoq.

Attartortoq inissiami ukiut 22-it najugaqarsimavoq, taamaattumik 35%-inik akikillisaavigineqassaaq, takuuk ilanngussa 2.

1.800.000 koruunit 35%-iat 630.000 koruuniuvoq.

Aalajangersakkami imm. 2, nr. 4-imi takuneqarsinnaasutut inissiap tallimanik initalip akianut akikillisaatissaq annerpaamik 555.000 koruuniusinnaavoq. 1.800.000 koruunit 35%-iisa annerpaaffissatut killiliussat qaangersimammagit, akikillisaatissat 555.000 koruuninik annertussuseqassapput, 630.000 koruuniussanatik.

Tunisinermi akiusoq 1.800.000 kr.

- akikillisaatissaq 555.000 kr.

+ suliamut aningaasartuutit 50.000 kr.

Tunisinermut aki aalajangiunneqartoq 1.295.000 kr.

Taakkunanga 40%-it imaluunniit 518.000 koruunit ukiuni 20-ni erniaqanngitsutut taarsersugassaanngitsutullu taarsigassarsiaritinneqassapput. 60%-it sinneruttut, tassalu 777.000 koruunit tunisisumut akilerneqassapput.

4) Illu ilaqutariinnut ataatsinut inissiaq sisamanik initalik, 1.300.000 koruuninik akeqartutut naliliiffigineqartoq.

Attartortoq ukiut tallimat arfinillillu akornanni inissiami najugaqarsimavoq, kisiannili illu ilaqutariinnut ataatsinut inissiaammatt tunisinermi akigititaasumut akikillisaasoqassanngilaq.

Tunisinermi akiusoq 1.300.000 kr.

+ suliamut aningaasartuutit 50.000 kr.

Tunisinermut aki aalajangiunneqartoq 1.350.000 kr.

Taakkunanga 40%-it imaluunniit 540.000 koruunit ukiuni 20-ni erniaqanngitsutut taarsersugassaanngitsutullu taarsigassarsiaritinneqassapput. 60%-it sinneruttut, tassalu 810.000 koruunit tunisisumut akilerneqassapput.

Imm. 3-imut

Attartortup qanoq sivisutigisumik attartorsimanerata naatsorsorneqarnerani, attartortup piffissami ataannartumi attartortitsisup pineqartup inissiaataani attartortittakkami attartorfigisaata tunngavigineqarnissaa aalajangersakkami aalajangersarneqarpoq. Tassalu attartortoq piffissaq tamakkerlugu attartortitsisumut

ataatsimut attartortuusimappat, aatsaat piffissaq piffissamut attartortuuffigisamut ilanngunneqassaaq, tassanilu attartortup inissiaq najugaa Namminersornerullutik Oqartussanit imaluunniit kommunimit pigineqassaaq. Attartortoq Namminersornerullutik Oqartussat inissiaataannit attartortittakkamiit kommunip inissiaataanut attartortittakkamut nuussimappat, paarlattuanillu pisimappat, piffissaq piffissamut attartortuuffigisamut ilanngunneqassanngilaq.

Tamatuma peqatigisaanik aamma piffissaq piffissamut attartortup attartortuuffigisaanut ilanngunneqassappat, attartorneq piffissaq tamakkerlugu allannguuteqanngitsumik attartortuuffigineqarsimasoq, attartortup ataannartumik attartortuuffigisaatut paasineqassaaq. Attartorneq sumiiffimmi ataasiinnarmi pisimappat, soorlu Nuummi, attartorneq kipineqarsimassanngilluinnarpoq. Tassalu attartortoq qaammatalunni inissiami attartortittagaanngitsumi najugaqarsimassanngilaq. Sumiiffinni assigiinngitsuni attartornermut atatillugu attartornerup qaammata pingasuni kipineqarsimanissaa akuerineqarpoq, tamannalu imatut takussutissiorneqarsinnaavoq. Attartortoq illoqarfimmi ataatsimi inissiamik attartortittakkamik attartornerminut isumaqatigiissutini juulip aallaqqaataani taamaatilugu, oktobarip aallaqqaataani illoqarfimmi allami inissiamut attartortittakkamut nuuttussaavoq. Taamatut unikkallarnermut attartortup pequtiminik sumiiffimmut nutaamut nassiussinissamut periarfissaqartinneqarnissaa tunngavigineqarpoq. Taamatuttaaq attartortup sumiiffimmi nuuffigisamini utaqqiisaasumik inissikkallarneqarneranik peqquteqartumik attartornermik kipisigallartarneq akuerineqarpoq. Tassalu utaqqiisaasumik inissikkallarneq tamatigut piffissamut attartortuuffigisamut ilanngunneqartassaaq. Taamaattumik piffissap attartortuuffigisap attartortoq nooqatigisassavaa.

Imm. 4-imut

Tigusinermut atatillugu aningaasartuutininut tamanut, tassunga ilaallutik inissiap nalilersorneqarneranut, siunnersuineranut, eqqartuussissuserisumut aamma naqissusiineranut akitsuummumut aningaasartuutininut matussutissatut attartortoq aalajangersimasumik 50.000 koruuninik akiliuteqassaaq. Aningaasat taakku agguataarineranut tigusinermullu atatillugu aningaasartuutiviusunut atanngillat. 50.000 koruunit taakku attartortup inissiamik attartukkaminik qaqugukkut inissiatut nammineq pigisatut tigusinissaminik aalajangenera apeqqutaatinnagu attartortumit akilerneqassapput. Taamaalilluni aningaasartaliussat tassaapput aningaasartat aalajangersimasut, tunisinernut tamanut atatillugu tunisinermit akiusumut ilaliunneqartussat.

§ 12-imut

Aalajangersakkap atuutilerneratigut inissiamut niuernermit naligititaasussap nalilerneqarnissaanut suliassamik ilisimasalimmut sumulluunniit attuumassuteqanngitsumut Namminersornerullutik Oqartussat imaluunniit kommuni naliliisitsisartussaapput. Suliassamik ilisimasalik sumulluunniit attuumassuteqanngitsoq illunik tuniniaasartuusariaqanngilaq, kisiannili najukkani niuernermit tunngassuteqartunik ilisimasaqassallunilu paasisimasaqassalluni.

Suliassamik ilisimasalik sumulluunniit attuumassuteqanngitsoq assersuutigalugu tassaasinnaavoq sillimasiisitsisartoq, eqqartuussissuserisoq, revisori, entreprenuri, aningaaserivimmi siunnersorti imaluunniit alla suliassamik ilisimasalik najukkami niuernermut tunngassuteqartunik ilisimasaqarlunilu paasisimasalik.

§ 13-imut

Imm. 1-imut

Aalajangersagaq aatsaat attartortup inissiami nammineq pigisassami attartortutut ukiut attartorfigisai tunngavigalugit tunisinermut akiumumut akikillisaaffigineqassappat atorneqassaaq. Tassalu akit nikingassutaannut qularnaveeqqusiissutip isumaa attartortumiit piginnittumut aaqqissuussineq pillugu Inatsisartut peqqussutaanni atuuttumut naleqqiullugu siunnersuummi matumani allaaneruvoq. Siunnersuut malillugu Namminersorerullutik Oqartussat imaluunniit kommuni inissiamut nammineq pigisamut akit nikingassutaannut qularnaveeqqusiissummik nalunaarsuititsissapput, taassumalu pisinermut akiumumut aningaasatigut appaatissat, attartortup ukiut attartorfigisai tunngavigalugit akikililiissutigineqartussat, annertoqqatigissavaa.

Inissiap nammineq pigisap tuniaarneratigut pisisup iluanaarniapilunnissaa pinngitsoorniarlugu aalajangersagaq ikkunneqarpoq.

Akit nikingassutaannut qularnaveeqqusiissutip annertussusissaa 50.000 koruuninut minnerpaaffissalerneqarpoq. Tamanna kinguneqassaaq Namminersorerullutik Oqartussat imaluunniit kommuni 50.000 koruuninit mikinerusumik akit nikingassutaannut qularnaveeqqusiissusiissanngitsut, tamanna iluanaarniapilunnissamik pinngitsuuiniarnermi pisariaqanngimmat.

Imm. 2-mut

Aalajangersagaq akit nikingassutaannut qularnaveeqqusiissutip akilerneqarnissaanut akilerneqartussat tulleriiarneqarneranni inissisimaneranut taaneqartumut ingerlatsiviup misissuisarnissaanut ilitersuutaavoq. Akit nikingassutaannut qularnaveeqqusiissut inissiap qularnaveeqqusiunneratigut, qularnaveeqqusiisarneq pillugu Kalaallit Nunaannut inatsit naapertorlugu nalunaarsorneqartumik qularnaarneqartassaaq. Tamanna qularnaveeqqusiissutitut uppersaatip akilerneqarnissaanut akilerneqartussat tulleriiarneqarneranni inissisimaneranik nikisitsinissamik piunasaqaammik qularnaveeqqusiissummi ilanngussinikkut pissaaq, tassani allanneqassalluni qularnaveeqqusiissutip siunnersuummi § 14, imm. 1 naapertorlugu taarsigassarsianut qularnaveeqqusiissutaasup, kiisalu pisinermut akiusup sinneranik aningaasalersuinissamut taarsigassarsianut qularnaveeqqusiissutip, akilerneqarnissaat akilerneqartussat tulleriiarneqarneranni inissisimaneera nikitsinneqassasoq. Tassungattaaq qularnaveeqqusiisarneq aamma qularnaveeqqusiisarnermut maleruagassat nalinginnaasut pillugit Kalaallit Nunaannut inatsit atuuppoq.

Inatsisitigut qularnaveequsiisussaataanerme akilerneqartussat tullerriiaarneranni inissiisarneq assersuusiak makku atorlugit takussutissiarineqarsinnaavoq:

Ilaqtariinnut arlalinnut inissiani inissiaq pingasunik initalik 965.000 koruuninut nalilerneqarpoq.

Attartortoq inissiami ukiut 13-it aamma 14-it akornanni najugaqarsimavoq, taamaammallu ilanngussaq 2 naapertorlugu 21%-imik akikillisaasoqarpoq. 965.000 koruunit 21%-iat 202.650 koruuniuvoq.

Aalajangersakkami imm. 2, nr. 2-imi takuneqarsinnaavoq inissiamut pingasunik initalimmut akikillisaatissaq annerpaamik 335.000 koruuniusinnaasoq.

Tunisinerme akiusoq 965.000 kr.
- akikillisaatissaq 202.650 kr.
+ suliarmut aningaasartuutit 50.000 kr.
Tunisinermut aki aalajangiunneqartoq 812.350 kr.

Taakkunanga 40%-it imaluunniit 324.940 koruunit ukiuni 20-ni erniaqanngitsutut taarsersugassaannngitsutullu taarsigassarsiaritinneqassapput. 60%-it sinneruttut, tassalu 487.410 koruunit tunisisumut akilerneqassapput.

Inatsisitigut qularnaveequsiisussaataanerme akilerneqartussanik tullerriiaarinerme inissiisarneq malillugu imatut tullerriiaarisoqassaaq:

Akilerneqartussatut siullertut inissisimasoq: tunisinerme akiusup 60%-ia pisisumit aningaasalersorneqartoq (487.410 koruuninik annertussuseqartoq).

Akilerneqartussatut siulliup tulliatut inissisimasoq: tunisinerme akiusup 40%-ia Namminersornerullutik Oqartussanit imaluunniit kommunimit ukiuni 20-ni erniaqanngitsutut taarsersugassaannngitsutullu taarsigassarsiaritinneqartoq (324.940 koruuninik annertussuseqartoq).

Akilerneqartussatut pingajutut inissisimasoq: akit nikingassutaannut qularnaveequsiissut tunisinerme akiumut akikillisaataasutut annertussuseqartoq (tunisereernerup kingorna ukiumi siullermi 202.650 koruuninik, tunisereernerup kingorna ukiup aappaani 182.385 koruuninik, tunisereernerup kingorna ukiut pingajuanni 162.120 koruuninik il.il. annertussuseqartoq).

Akit nikingassutaannut qularnaveequsiissut ukiut 10-it ingerlaneranni ukiut tamaasa 1/10-imik nalikilliartuaartinneqassaaq, tassa imaappoq akit nikingassutaannut qularnaveequsiissut ukiumut 20.265 koruuninik nalikillilerneqartassaaq.

Imm. 3-mut

Aalajangersakkami Namminersornerullutik Oqartussat imaluunniit kommunip akit nikingassutaannut qularnaveequsiissutaasa ukiut qulit ingerlanerini nalikillisikkiartuaarneqartarnissaat aalajangersarneqarpoq. Taamaattumik piginnittup

inissiaq tiguneraniit siusinnerpaamik ukiut qulit qaangiunnerini inissiaq nammineq pigisani akit nikingassutaannut qularnaveeqqusiissummut tunngatillugu Namminersornerullutik Oqartussanut imaluunniit kommunimut aningaasaqarnikkut pisussaaffeqarfiunngitsumik niuernermi piumasagaatinik tunngaveqarluni tunisinnaavaa.

Taamaalilluni aalajangersakkakut pisisup pisinerminit ukiut 10-it qaangiutsinnagit inissiaq tunissagaluarpagu aningaasatigut iluanaarniarsinnaaneq periarfissaajunnaarsinneqarpoq.

Imm. 4-mut

Akit nikingassutaannut qularnaveeqqusiissut taamaallaat iluanaarniapilunnissamut illersutitut atuutsinneqalerpoq, taamaalilluni pisisoq inissiamik tigusermi kingorna piffissap sivikitsup qaangiunnerani inissiamik nammineq pigisaminik tunisinermini iluanaalertornissaa pinngitsoortinniarnaqarluni. Taamaattumik piginnittut nikinnerini akit nikingassutaannut qularnaveeqqusiissut malillugu pingaarnertut aningaasat tamatigut akiligassanngortinneqartassapput.

Tamatumunngali pinngitsuiffiusussatut pingaarutilittut aalajangersarneqarpoq, toqusoqartillugu piginnittut nikinneranni, tassalu pisortatigoortumik taamatullu namminerisamik testamentiliorfiusumik testamentiliorfiunngitsumillu kingornussinermi akit nikingassutaannut qularnaveeqqusiissut akilerneqassanngitsoq. Tassalu inissiaq nammineq pigisaq aningaasat akiligassanngortinneqanngikkaluarlutik kikkunnulluunniit testamentiliorneqarsinnaavoq.

Aalajangersakkap matuma saniatigut aappaasoq qimagaasoq kingornussassat suliarineqanngikkaluartut inissiami najugaqaannarsinnaavoq, kingornussassat suliarineqanngitsut najugaqaannarneq piginnittut nikinnerattut isigineqanngimmat. Kisianni aappaasup qimagaasup piginnittup toqunerata kingunitsianngua inissiaq nammineq pigisaq allamut tunissappagu akit nikingassutaannut qularnaveeqqusiissut akiligassanngortinneqassaaq, pisoq taanna piginnittup toquneranut atatillugu allamut tunisinertut isigineqanngimmat.

Akit nikingassutaannut qularnaveeqqusiissutip akilerneqartarnerani ilaatinneqanngitsoq annertoq tassaavoq, averusernermut avinnermulluunniit atatillugu aappariit imaluunniit aappariittut nalunaarsorsimasut akornanni piginnittut nikinnerat. Taamatut pisoqartillugu tamanna iluanaarniapilunnissamut tunngavigineqarsinnaanngilaq, taamaattumillu tamanna toqusoqartillugu piginnittut nikinnerannut nallersuunneqarsinnaalluni.

Imm. 5-imut

Aalajangersakkami akit nikingassutaannut qularnaveeqqusiissutinik isumakkeerisinnaaneq pillugu maleruagassanik Naalakkersuisut aalajangersaasinnaanissaannik piginnaatinneqarput. Aalajangersagaq ilanngunneqarpoq, assersuutigalugu nunami najukkamilu pissutsit inissiamut

tungassuteqartut peqqutaallutik inissiamik piginnittup ukiunik 10-inik piffissaqartinneqarnissaata atuutsiinnarnissaat naapertuutinnngissinnaammat. Assersuutigalugu inissiaq nammineq pigisaq nunaqarfimmi pigisanik aalaakkaasunik niuerfiukulannngitsumi inissisimappat piginnaatitsissutip atortinneqarsinnaanera eqqarsaatigineqarpoq.

Tamatigut piginnaatitsissut taamaallaat atorineqarsinnaassaaq iluanaarniapilunnissamut illersuutissaq tamatumuuna sanngiillisinneqanngippat.

§ 14-imut

Imm. 1-imut

Aalajangersakkami pisortat taarsigassarsititsisarnermut aqqissuussinerat, attartortup Namminersornerullutik Oqartussat kommunillu inissiaataannik attartortittakkamik inissiatut illutulluunniit nammineq pigisatut tigusineranut atatillugu neqeroorutigineqartartoq nassuiarneqarpoq. Attartortup inissiamik attartukkaminik inissiatut imaluunniit illutut nammineq pigisatut tigusissaguni peqqussutissatut siunnersuummi matumani piumasaqaatit naammassisinnaagunigit taarsigassarsinissamik aqqissuussinermik atuisinnaatitaavoq, tamannali piumasaqaataannngilaq. Taarsigassarsinissamut aningaasatigut annerpaaffissatut killiliisoqanngilaq. Taarsigassarsiasap annertussusissaanik naatsorsuinermit tunisinermut akiusoq inaarutaasoq tungavigineqassaaq. Tassalu tunisinermut akiusoq akikillisaatitaqassappat taakku peereernerini 40%-it aatsaat naatsorsorneqassapput.

Namminersornerullutik Oqartussat imaluunniit kommuni toqqaannartumik toqqaannanngitsumilluunniit tunisinermut akiusup sinneranut aningaasalersueqataassanngillat.

Imm. 2-mut

Aalajangersakkami akilersuinermit atugassarititaasut, Namminersornerullutik Oqartussanit imaluunniit kommunimit taarsigassarsianut attuumassuteqartut nassuiarneqarput. Taarsigassarsiat ukiuni 20-ni ernialersugaassanngillat akilersugassanngussanatillu, tamatumalu kingorna ukiuni 15-ini annertoqqatigiinnik aningaasartalerlugit, ukiumut Nationalbankip erniarititaa 3%-imik ilallugu erniaqartillugit akilersorneqassapput.

§ 15-imut

Namminersornerullutik Oqartussat imaluunniit kommunip taarsigassarsiarititai inissiap imaluunniit illup nammineq pigisap, qularnaveeqqusiisarneq pillugu Kalaallit Nunaannut inatsit naapertorlugu nalunaarsorneqartup qularnaveeqqusiunneratigut qularnaarneqassapput. Aalajangersakkami oqaatigineqarpoq taarsigassarsiat tunniunneqannginnerini ingerlatsivimmiit

misissorneqassasoq Namminersornerullutik Oqartussat imaluunniit kommunip qularnaveeqqusiissutaata akilerneqarnissaa taaneqartumut inissinneqarsimanersoq. Tamanna ajornartorsiorfiusussaassanngilaq, Namminersornerullutik Oqartussat imaluunniit kommuni tigusinissaq sioqqullugu piginnittuussammata, taamaalillutillu piffissami tassani inissiaateqarfimmut qularnaveeqqusiissutinik nalunaarsuisinnaasuni kisiartaassallutik. Tamatuma kingorna qularnaveeqqusiinermi uppersarsaammumut, qinnuteqartup aningaasalersuutissat sinnerinik taarsigassarsiarisinnaasaanut tunngatillugu, akilerneqartussat tulleriarneqarneranni inissisimanerup nikisinneqarnissaanik piumasaqaat ilanngunneqassaaq. Tassungattaq qularnaveeqqusiisarneq aamma qularnaveeqqusiisarnermut maleruagassat nalinginnaasut pillugit Kalaallit Nunaannut inatsit atuuppoq.

§ 16-imut

Imm. 1-imut

Aalajangersakkami piginnittut nikinneranni qularnaveeqqusiissutitut uppersarsaat naapertorlugu aningaasaatit akiligassanngortinneqarnissaat aallaavigineqarpoq. Tamatumunnga pinngitsuuineq pingaarutilik tassaavoq qularnaveeqqusiissutitut uppersarsaammi atugassarititaasunik allanik aalajangersaasoqarsimasinnaanera.

Pinngitsuuineq alla pingaarutilik tassaavoq inuinaat akornanni piginnittut nikinneranni aammalu Namminersornerullutik Oqartussat imaluunniit kommunip qularnaveeqqusiissaanni qularnaveeqqut qularnaveeqqusiissutip nalingata 90%-ata iluanniippat, aningaasaatit akiligassanngortinneqassanngitsut. Taamatut pisoqarsinnaavoq, tassami pisisoq nutaaq pisinerminut aningaasalersuiniarluni nutaanik taarsigassarsisimatillugu, Namminersornerullutik Oqartussat kommunillu taarsigassarsiarititaasa akilerneqarnissaasa inissisimanerat nikittarpoq.

Namminersornerullutik Oqartussat kommuniluunniit taarsigassarsiarititaminnik sukkulluunniit qularnaarisimanissaat qulakkiivinniarlugu qularnaveeqqusiissutip tunisinerminut akiusup 90%-iisa iluanniitinneqarnissaat aalajangerneqarpoq. Tassani tunisinerminut akiusup inissiap illulluunniit nammineq pigisap niuernerminu nalinganut ersiutaanissaa naatsorsuutigineqarpoq.

Assersuutigalugu attartortup inissiaq attartukkani 1.000.000 koruuninik akilerlugu inissiatut nammineq pigisatut tigusiappagu, tassunga aningaasalersuutit imatut isikkoqarsinnaapput:

400.000 koruuninik Namminersornerullutik Oqartussanit imaluunniit kommunimiit taarsigassarsititsisoqarpoq, 400.000 koruunillu realkredittimit taarsigassarsinikkut aningaasalersorneqarput, kiisalu 200.000 koruunit aningaaserivimmit taarsigassaarsiaapput, taakkulu pigisanik aningaaserivimmut qularnaveeqqusiissuteqarnikkut qulakkeerneqarput.

Ukiut marluk qaangiunnerini illu 1.400.000 koruunilerlugu tunineqarpat Namminersornerullutik Oqartussat kommunilluunniit qularnaveeqqusiissutaata

akilerneqarnissaata inissisimanagera qularnaveeqqusiissutip 1.260.000 koruunit (tunisinnermut akiusut 90%-ia) iluaniiginnartinnerani kingusinnerusumut inissinneqassanngilaq. Taamaakkaluartoq qularnaarisimaneq kingusinnerusumut inissinneqassagaluarpat qularnaveeqqusiinnermut uppersarsaat malillugu aningaasaatit tamakkiisumik akiligassanngortinneqassapput.

Imm. 2-mut

Aalajangersagaq ingerlatsivimmuut ilitsersuutitut paasineqassaaq, akilerneqartussanik tulleriinnilersuinnermi aalajangersakkatut paasineqarani. Piginnittut nikinneranni Namminersornerullutik Oqartussat kommunilluunniit taarsigassarsiarititaat akiligassanngortinneqanngippata, pisisoq nutaaq atugassarititaasut allanngortinnagit taarsigassarsianik ingerlatitseqqinnissamik pisinnaatitaaffilerneqassaaq. Akiitsullit nikinneranni qularnaveeqqusiissutitut uppersarsaammum tapertaliussassamik kiisalu akiitsunik tigusernermut nalunaarummik sanasoqassaaq. Kiisalu taarsigassarsiat allat piginnittut nikinnerannut atatillugu taarsigassarsiarineqartariaqartut taarsigassarsiarineqarneranni, Namminersornerullutik Oqartussat kommunillu qularnaveeqqusiussaqaarlutik taarsigassarsiarititaasa akilerneqarnissaasa akilerneqartussat tulleriiaarneranni inissisimanagera nikisinneqassaaq. Tassani nikisitsineq qularnaveeqqusiinnermut uppersarsaammum nalunaarneqassaaq. Tassungattaq qularnaveeqqusiisarneq aamma qularnaveeqqusiisarnermut maleruagassat nalinginnaasut pillugit Kalaallit Nunaannut inatsit atuuppoq.

Imm. 3-mut

Aalajangersakkami qularnaveeqqusiinnermut uppersarsaat malillugu aningaasaatinik tamatigut akiligassanngortitsisarnermi pissutsit marluk taaneqarput.

Nr. 1-imut

Taarsigassarsisup qularnaveeqqusiinnermi uppersarsaat malillugu taarsigassarsinnermut atugassarititaasut sumiginnarsimappagit, taarsigassarsiat tamatigut akiligassanngortinneqartassapput. Tassani assersuutigalugu taarsigassarsisup ernianut akilersuutinullu piffissaq eqqorlugu akiliisimannginnera eqqarsaatigineqarpoq. Tassalu taarsigassarsisoq taarsigassarsiaminut akilersuutiminut akiliisinnaanngikkuni Namminersornerullutik Oqartussanut imaluunniit kommunimut akilersuinissamik isumaqatigiissuteqarsinnaassanngilaq. Taamatut akiligassanngortitsisarneq tigusernermiit siusinnerpaamik ukiut 20-t qaangiunnerini pisartussanngussaaq, Namminersornerullutik Oqartussanut imaluunniit kommunimut taarsigassarsiat ukiuni 20-ni erniaqartinneqartussaannngimmata akilersorneqartussaananatillu.

Tamatuma saniatigut assersuutigalugu taarsigassarsisup inissiamik illuummilluunniit nammineq pigisaminik illersorsinnaasumik aserfallatsaaliuinissamut pisussaaffeqarnera eqqarsaatigineqarpoq. Taarsigassarsisoq illup sananeqaataasa ilaannik pisariaqartitsilernerme taarsersuisussaavoq iluarsaassisussaallunilu, assersuutigalugu qaliaq ussiitsoq imaluunniit igalaat ussiitsut taarsersortussaavai iluarsaattussaallugilluunniit. Kiisalu taarsigassarsisoq tulleriaaraluni

aserfallatsaaliuisussaavoq, soorlu illup silataa pisariaqalerneratigut qalipattartussaallugu. Naalackersuisut kommunalbestyrelsillu qularnaveeqqusiiffigisanut nakkutilliinermikkut aalajangersagaq atuutsissavaat.

Nr. 2-mut

Nr. 2 naapertorlugu inissiamik attartortittakkamik nammineq pigisamik attartortitsinermi akigititaasoq taarsigassarsisup aningaasartuutit malillugit attartortitsinermit aningaasartuutaanit qaffasineruppat, nutaatut tamanna akiliisussanngornermut tunngaviussaaq. Tassalu taarsigassarsisimasoq attartortitsinermini annerpaamik aningaasartuutit, inissianik attartortitsisarneq pillugu Inatsisartut peqqussutaanni nr. 2-mi, 12. maj 2005-imeersumi aalajangersarneqartut tunngavigalugit ineqarnermut akiliuteqartitsisinnaassaaq.

Inissianik nammineq pigisanik attartortitsisarneq pillugu maleruagassat inissianik attartortitsisarneq pillugu Inatsisartut peqqussutaanni allanngortinneqarpata, peqqussummi matumani innersuussutaasut inissianik attartortitsisarneq pillugu Inatsisartut peqqussutaanni inissianik nammineq pigisanik attartortitsisarnermi akiliutip naatsorsorneqartarneranut maleruagassanut sukkulluunniit atuuttunut innersuussutitut paasineqassapput.

Inissianik attartortitsisarneq pillugu Inatsisartut peqqussutaanni ineqarnermut akiliummik aalajangersaasarnermi pineqaatissiisinaanermut aalajangersakkanik immikkut ittunik atuutsitsinissaq pisariaqartutut isumaqarfigineqarpoq, siunnersuummi matumani Namminersorerullutik Oqartussat kommunilu taarsigassarsititsisutut ineqarnermut akiliutip inissianik attartortitsisarneq pillugu Inatsisartut peqqussutaanni ineqarnermut akiliutit aalajangersarneqartarnerannut maleruagassat unioqqutinneqarnerat uparuarsinnaammassuk. Inissianik attartortitsisarneq pillugu Inatsisartut peqqussutaanni attartortoq ineqarnermut akiliutip ineqarnermut akiliutinik aalajangersaasarneq pillugu maleruagassat uniorlugit aalajangersarneqarsimanerannik uparuaasinnaavoq.

Kiisalu Namminersorerullutik Oqartussat kommunilu taarsigassarsititsisutut taarsigassarsisumut attartortitsisumullu, inissianik attartortitsisarneq pillugu Inatsisartut peqqussutaat naapertorlugu annertunerungaatsiartumik akeqartitsilluni inissiamik pigisaminik attartortitsisumut, pineqaatissiisinaanissaat kissaatiginarpoq.

Naalackersuisut kommunalbestyrelsilluunniit taarsigassarsisup inissianik attartortitsisarneq pillugu Inatsisartut peqqussutaanni ineqarnermut akiliutinik aalajangersaasarnermut aalajangersakkat uniorlugit inissiamik illuummilluunniit nammineq pigisaminik attartortitsineranik paasisaqartarneranni aalajangersagaq atuutsinneqarsinnaavoq.

Aalajangersakkami Naalackersuisut kommunalbestyrelsilluunniit tigusillattaarlutik misissuisarnissamut aammalu kaammattorneqaratik attartornermut isumaqatigiissutinik uppersaatinilluunniit allanik tunniussisoqarnissaanik qinnuteqarsinnaanissaannut isumalluutinik atuinissaat siunnerfigineqanngilaq. Kisiannili Naalackersuisut kommunalbestyrelsilluunniit soorunami attartortumit

saaffignilluni inatsisit uniorlugit attartortitsisoqarneranik ilisimatitsisumit attartornermut isumaqatigiissutip assilineranik, kontop nikerarneranut takussutissianik allanillu tunineqarnissaminnik piunasaqarsinnaassapput. Taamatut pisoqartillugu uppernarsaatini tunniussinermi attartortup isumaqataasarnissaa naatsorsuutigineqarpoq.

§ 17-imut

Imm. 1-imut

Peqqussut 1. januar 2008-imi atuutilissaaq.

Atuutsitsilernissamut aalajangersakkap atuutilerneratigut qinnuteqaatit peqqussutissatut siunnersuutip atuutilerneqarnerata kingorna taamaallaat tiguneqartut peqqussutissatut siunnersuummi matumani maleruagassat malillugit suliarineqartassapput. Naalackersuisuni imaluunniit kommunalbestyrelsimi qinnuteqaatip allakkatut isertinneqarnerani ulluliussaq tamatumunnga atatillugu aalajangiisuutinneqartassaaq.

Qinnuteqartut ilaannut qinnuteqaatip Namminersornerullutik Oqartussat kommunillu inissiaataasa attartortittakkat pigisatut inissiannngortissinnaanerata pillugu Inatsisartut peqqussutaat nr. 5, 21. maj 2002-meersoq kingusinnerusukkat allannguuteqartinneqartoq naapertorlugit suliarineqarnissaa pitsaanerpaajusussaa voq, qinnuteqartulli ilaannut qinnuteqaatit peqqussutissatut siunnersuummi matumani aalajangersakkat naapertorlugit suliarineqarnissaat pitsaanerpaasussaalluni.

Qinnuteqaatit peqqussutissatut siunnersuutip matuma atuutilernerani naammassillugit suliarineqarsimanngitsut utertinneqarsinnaapput. Tamatuma kingorna qinnuteqaammik nutaamik nassiussisoqarsinnaavoq, taannalu peqqussutissatut siunnersuummi matumani maleruagassat naapertorlugit suliarineqassaaq.

Qinnuteqaatip naammassillugu suliarineqarsimaneranut pisinissamut pisussaaffiliisumik isumaqatigiissuteqartoqarsimanera apeqqutaassaaq. Siumoortumik pisinissamut isumaqatigiissusioqqaarani piginnittuunermt uppernarsaammik atsiuineq atuuttussaatinneqassaaq, tamatumani piginnittuunermt uppernarsaammi piunasaqaatini tamanna aalajangersimasumik isummerfigineqarsimanngippat.

Imm. 2-mut

Aalajangersakkami oqaatigineqarpoq pineqartumut peqqussut atuuttuusimasoq atorunnaarsinneqassasoq.

Nalunaarutilli atorunnaarsinneqartup imaata annersaa siunnersuummi § 3-mi oqaasertaliorneqarpoq.

Imm. 3-mut

Aalajangersakkami erseqqissarneqarpoq Namminersornerullutik Oqartussat kommunillu inissiaataannik attartortittakkanik teknikkikkut aningaasaqarnikkullu naliliisarneq pillugu nalunaarut nr. 9, 12. maj 2003-meersoq atuutiinnassasoq. Nalunaarut taanna aamma pineqartunut allanut arlalinnut pingaaruteqarmat, taassuma atorunnaarsinneqarnissaa naapertuutinngilaq.